

Roron i Akus

Marko

kata salik ia

Ainoai i vuk mengen si Akus Ro ke Marko kapo atangis ia asukang ke, “Kana na Akus Ro i Iesu Karisto nat i God. (1:1)” Si buk ke taralapo arai korong ta Iesu kapo atogon dual na asan lava si abis ani keve avibisan aongos. Tarapo arai korong ania si taun ang katapo vil akalit si ri vap, na kata kirikai suai ani keve malanganto rikek singina, na kata lomom suai ani rikek si ri vap. Iesu kata posong akorong pok ia ta igenen i pukun, na kata serei ani kame alis pok tatana, asi samui apok ani to si ri vap aongos. Marko kapo akus alava ta avibisan si Iesu, na parik kapa aunai i akus alava ta keve mengen ang katapo mengen tatana. Marko kata akusku aino ta avibisan si Ioanes katakai i asing tauia, le na kala akus ta Iesu kata luk kana asising tauia, na Satan kata atokngai ania. Le na tarala arai ta Iesu kata ngorem ri vap si asalak ani keve mamaiten duk, kata akalit aro iria. Sikei vap po petau ang ania, kari marala ania kala serei alava luai. Akamusai i palpal i buk ke kapo akus ta Iesu katala mat na kala tadut pok.

Akusku si Ioanes katakai i asing tauia

(Mt 3:1-12; Lk 3:1-9; Io 1:19-28)

1 ¹Kana na tutapongai i akus ro ani Iesu Karisto, nat i God, ²val kita salik ia nei buk si Esias, katakai i kus amalangas, **Arai, naka asok kag asosokai aino anim ani kan itoiton selen anim.** ³**Kalingana i mangsikei kapo songosongo nei ring varasai palau ta mi usausa na selen ani Volava, mi itoiton ta selen korong** ania. ⁴Ioanes katakai i asing tauia katapo ago nei ring varasai palau, na kapo akusku ri vap ta ki luk a asing tauia asi akanangai ani kari la lomom pokai na God ka lomom suai ani kari keve lau rikek. ⁵Na ri vap aongos i palpal Iudaia na Jerusalem kita pasal taun ia na kianla mengen amalangas ta kari keve lau rikek na kala asing tauia iria si sung ang Iordanes. ⁶Ioanes katapo alak na vakup kita abis ia ta ung i kamel na katapo ngenge ta pauk i vongo, na katapo pok ta bivo na murungan. ⁷Na katapo akusku

asukang ke, “Aimung ig kapo atogon a mangsikei ka serei lak, kapo tavirimok anig, napo tav ro angkoai ve asosokai palau vopo sovusulai si luk suai ani pauk i kakina. ⁸Nau natala asing tauia imi ta laman, sikei ninia ka asing tauia imi ta Malanganto Gogoai.”

Asing tauia ani Iesu
(Mt 3:13-17; Lk 3:21-22)

⁹Si taun ang Iesu kala papelek a Nasaret si palpal Galilaia, na Ioanes kamela asing tauia ia si sung ang Iordanes. ¹⁰Na akorong palau si taun ang kapo kiklak le nei laman, kala arai ani metekuku kala tavas na Malanganto kala pasiang taun ia asukang val uk. ¹¹Na kalinga kala serei le metekuku ta, “Numai kag nat ro. Napo buk alava ua. Napo uruk luai anim.”

Atokngai ani Iesu
(Mt 4:1-11; Lk 4:1-13)

¹²Nang palau Malanganto kala asok ia ane nei ring varasai palau. ¹³Na kanla ago nei ring varasai palau ani 40 na taun aongos, na Satan katapo atoktokngai ania, na kapo ago nei liuan i mamain ta kei, na ri angelo kipo pakangai ania.

Iesu kata tutapong abis e Galilaia
(Mt 4:12-17; Lk 4:14-15)

¹⁴E mung i la teng akit tapai ani Ioanes, Iesu kamela serei e Galilaia na kalapo akusku ta akus ro i God, ¹⁵“Kala sinong a taun, na kana vainagoan a God kala angasungai! Mi lomom pokai pelek kami keve lau rikek, na mi lomlomom ta akus ro!”

Songo ani puat a katakai i maiak
(Mt 4:18-22; Lk 5:1-11)

¹⁶Na kala ulit aliu ngerelo i laman tatapulitai e Galilaia, na kala arai ani ri Simon ve Andreas, nang a tasina i Simon, kilongtapo sog, using kilongtapo katakai i maiak. ¹⁷Na Iesu kala antok irilong, “Milong using iau, na naka itoiton imilong asi kamilong sog ani ri vap.” ¹⁸Nang palau kilongla papelek karilong keve uvene na kilongla using ia. ¹⁹Na kala anguan ulit avunga lik an, na kala arai ani Iakovo, nat si Sebedaio, kuvul ve tasina ta Ioanes, kilongtapo itoiton karilong keve uvene kuli vul. ²⁰Nang palau kala songo irilong na kilongla papelek a tamari-long ta Sebedaio kuli vul ve kana vap i po seupok, na kilongla using ia.

Igenen malanganto rikek kata aol ia
(Lk 4:31-37)

²¹Na kila pasal ane Kaparnaum na akorong palau si taun i atailai kanla riuk lak nei lu i kivung na kanla vil akalit si ri vap. ²²Na kipo taping ani

kana akalkalit, using kapo akalit iria val igenen atogon kitmat, na parik val keve vap malangas ani saupai. ²³Na si taun ang palau nei kari lu i kivung, katapo atogon a mangsikei a igenen, malanganto rikek katapo aol ia, na kala songosongo alava ta, ²⁴“Iesu le Nasaret, kupo buk vil sa vang kana animem? Sa, kupo serei kana asi kam me vil punuk suai animem? Napo malangas ua. Numai a nat gogoai i God!” ²⁵Na Iesu kala atakun ia ta, “Ku musik! Soun suai ania!” ²⁶Na malanganto rikek ang kala savatigai ania na kala kup alava na kala soun suai. ²⁷Na kilapo taping aongos velai ani anganasai ta, “Au, sa kana? Akalkalit tanginang? Kapo asok velai ani kitmat na ri ingua kapa kipo longong ia.” ²⁸Na si taun ang palau, akusku ina kalapo pasal apapanai nei keve palpal aongos aulitai ani Galilaia.

Iesu kata vil ato na vap miang

(Mt 8:14-17; Lk 4:38-41)

²⁹Na kala soun pelek a lu i kivung na kanla palak nei lu si ri Simon ve Andreas, kuvul ve ri Iakovo na Ioanes. ³⁰Na omona i Simon katapo matung ta mulak, na akorong palau kila antok ia tatana. ³¹Na kala pataun ia, kala teng a kungana na kala ngai atung ia. Na mulak ang kala papelek ia. Na kala sasagi aniria. ³²Ngelik i taun ang, si makarap kalapo siang, kila serei singi na ta mamain ta vap malepen na ria ingua katapo aol iria. ³³Mete takaman i lu ang katapo vaba luai ta ri vap aongos i rina ang. ³⁴Na kala vil ato na vap miang kipo atogon a keve malepen angpetpetekai. Na kata kirikai suai ani ri ingua miang. Na parik katapa atalipai ani ri ingua asi mengen, using kipo malangas ta ninia kapa si.

Paspasal asi an akusku

(Lk 4:42-44)

³⁵Na si no i tangat kala tapasuk na kanla pasal taun a ring vauvau, na kanlapo sokotuk. ³⁶Na Simon ve vap po auai ve nia kila pasal using ia ³⁷na kianla sabonai ania na kila antok ia ta, “Ri vap aongos kipo gule ua.” ³⁸Na kala antok iria ta, “Tara pasal ane si mang matan rina aliu, ani nan akusku kapa singiria, using ninia vanang a tukulai ina i kag soun.” ³⁹Na kala pasal aulitai ani Galilaia aongos na kanla akusku nei kari keve lu i kivung na ka lu suai kapa ani ri ingua.

Iesu kata vil adaus na igenen tapak

(Mt 8:1-4; Lk 5:12-16)

⁴⁰Na mangsikei a igenen tapak kamela serei singina. Kamela sovusulai na kala sokotuk ia ta, “Man kupo naung, kupo angkoai si vil adaus anig.” ⁴¹Na kala ngorem alava ia, na kala sulai ani kungana na kala teng e pukun ina, na kala antok ia ta, “Io, napo naung, kula daus!” ⁴²Nang

palau pukun tapak ang kala kovek pelek ia, na kala daus. ⁴³Na kala mengen amadot ia velai ani asok suai ania ⁴⁴velai ani kapo antok ia ta, “Ku ago ta an antok ani mang-sikei ta nem ke, sikei, ku pasal akorong na kuan akalit ta pukun im si katakai i sula, ani ka suluk a alilis ang i kam vilvil atanginang val saupai si Moses kapo antok, ani ri vap asi kari nas ta kulapo daus.” ⁴⁵Sikei kala pasal na kanla renge alava ta akusku ke. Asukang na kalapo lolokovo na parik kalapa serei amalangas e nei rina, sikei kala ago si ring vauvau e komo. Na ri vap i keve rina aongos kime lapo serei singina.

Iesu kata vil ato na igenen soles

(Mt 9:1-8; Lk 5:17-26)

2 ¹Au kala papok ane Kaparnaum, na e mung i mang rukun taun, kila longong ta kalapo ago nei lu, ²na vap miang kimela duk luai tung e mete takaman. Na kapo kovek i pangau kapo vauvau, na kalapo akusku iria ta mengen i God. ³Na kimela serei singina ta mang igenen soles. Puat a igenen kitapo asalak ia. ⁴Na using kata lapo duk arikek a ring ang parik kitapa angkoai si palak taun ania. Na kianla luk suai ani palpal i kuluna i lu ang akorong si ring ang katapo ago singina na kila sunguk a pata, soles ang katapo matung singina, na kila asiang ia taun ia. ⁵Si taun a Iesu kala arai kinle ani kari lomlomon na kala antok a soles ang ta, “Kag nat, kam keve lau rikek, nala lomon suai ania.” ⁶Au, mang vap malangas ani saupai kitapo sinong e iang na kitapo atogon susui musik nei lomlomonai iria asukang ke, ⁷“Marai sa na igenen ke kapo mengen asukang ke? Kapo mengen i nau varas nang! Si kapo kun koi asi lomon suai ani lau rikek? God papalik nang!” ⁸Na Iesu kalapo nas lenginang kari lomlomonai na kala sui iria, “Marai sa mipo angsusui ai e lomlomonai imi? ⁹Si i ngono bil ke kapo remrem si antok ania? Nala lomon suai ani kam lau rikek, vo si antok ta ku tapasuk na ku sunguk kam pata na ku pasal? ¹⁰Sikei, asi kami nas vang ta igenen i pukun kapo atogon a roron kuli rina si kana lomon suai ani rikek,” le na kala antok na igenen soles ang ta, ¹¹“Napo antok ua, tadut na ku sunguk le kam pata na ku pasal ane rina.” ¹²Na akorong palau si taun ang, kala tadut e mataria aongos na kala sunguk kana pata na kala soung. Na kilapo taping na kila alatun a God na kila antok, “U, voivoi ka mat, tara lapo arai ani bil asukang ke!”

Songo ani Levi

(Mt 9:9-13; Lk 5:27-32)

¹³Na kala anguan pasiang pok an ane ngerelo na vap duk kimela auai ve nia na kamela akalit iria. ¹⁴Na taun ang kapo paliu, kala arai ani Levi, nat si Alpaio, katapo sinong nei lu i po luk takis, na kala antok ia,

“Me using iau.” Na kala tadut na kala using ia. ¹⁵Na kanlapo angan nei kana lu, na petau duk, vap po luk takis na mamain ta katakai i bil arikek kimela sinong kuvul ve Iesu na kana keve nat i akalit, using vap duk kitapo using ia. ¹⁶Na mang matan i ri Parisaio, vap po malangas ang ani saupai, taun kila arai ania si po angan kuvul ve ri katakai i bil arikek na vap po luk takis, kila mengen kana keve nat i akalit ta, “Marai sa na kapo angan kuvul ve vap po luk takis na ri katakai i bil arikek?” ¹⁷Na Iesu kala longong na kala antok iria, “Vap po to aro parik kipa inongos taun a katakai i vilvil ato, sikei ri malepen vang kipo inongos taun ia. Parik natapa serei asi me songo ani vap korong, sikei ri katakai i bil arikek.”

Laulauan i alal

(Mt 9:14-17; Lk 5:33-39)

¹⁸Keve nat i akalit si Ioanes na keve nat i akalit si ri Parisaio kitapo alal, na mang vap kimela sui ia ta, “Kapo saka bil an na keve nat i akalit si Ioanes na keve nat i akalit si ri Parisaio kipo alal sikei kam keve nat i akalit parik kipa alal?” ¹⁹Na Iesu kala antok iria, “Sa, kapo angkoai ta keve tungana i vo tauk i pagamau ki mal si taun ang kipo ago kuvul ve nia? Kapo tav angkoai, using a vo tauk i pagamau kapo ago lak ve ria. ²⁰Ka atogon a taun lak na kila luk suai ani vo tauk i pagamau pelek a keve tungana. Taun ang vanang ki mal lak.

²¹Kapo tav angkoai si tara suisui alak ani vuk vakup tanginang si maus kavang. Man asukang, vuk vakup tanginang ang ka ding pok a maus ang na ka vil alava pok na tading ang. ²²Na kapo tav angkoai kapa si tara lingai ani vaen tanginang si pauk kavang, vei pauk ang ka tading. Sukana na pauk kala rikek na vaen kala kovek kapa. Sikei, vaen tanginang vanang kapo ro si pauk tanginang.”

Rok kon si taun i atailai

(Mt 12:1-8; Lk 6:1-5)

²³Si mang sikei a taun i atailai katapo pasal aliu nei keve matang kon. Na kana keve nat i akalit kilapo pasal aliu na kipo rok a mang matan kon. ²⁴Na ri Parisaio kila sui ia, “Arai, marai sa kana kipo abis a lau ke kapo tav angkoai si abis ania si taun i atailai?” ²⁵Na kala antok iria, “Au si parik lak kana mitapa tataot a akusku i David na sa kata abis ia si taun katapo atogon a inongos using katapo buk angan, ninia ve keve tungana? ²⁶Kata palak nei lu si God, si taun ang a Abiatar katapo ainoai i katakai i sula, na kala angan a pok i asinong akipai ang voiang ri katakai i sula papalik kipo atogon a roron asi angan ania, na kala alis kapa si keve tungana.” ²⁷Na kala mengen iria, “Taun i atailai, God kata asinong ia asi pakangai ani igenen, na parik ta igenen asi pakangai ani taun i atailai. ²⁸Asukang na igenen i pukun kapo Volava i taun i atailai kapa.”

Igenen kunga mat
(Mt 12:9-14; Lk 6:6-11)

3 ¹Na kala anguan palak an nei lu i kivung, na katapo atogon a mangsikei a igenen e iang kungana katapo mat. ²Na kilapo teremai ania ta man kala vil ato ia, ki aoles ia using kapo taun i atailai. ³Na kala antok a igenen kunga mat ang ta, “Me ane ke.” ⁴Na kala sui iria, “Saupai i taun i atailai kapo asok ira si pakangai vo vil arikek? Si vil ato vo si vil punuk?” Sikei kipo musik lik palau. ⁵Na kala ararai aulitai aniria velai ani neikien na makus using a vingaria kapo kit. Na kala antok a igenen ang, “Ku koros a kungam.” Na kala koros a kungana na kala pukunan aro pok. ⁶Na ri Parisaio kila soung na akorong palau kianla gulegule selen ve kana vap a Erodes ta ki saka raung an ania.

Petau duk e ngerelo

⁷Iesu ve kana keve nat i akalit kila papelek a ring ang ane ngerelo. Na petau lava le Galilaia kila using ia. Na le Iudaia kapa, ⁸na le Ierusalem, le Idumaia, na le mang palpal i sung Iordanes, na le Turo na Sidon. Petau lava ke kita lapo longong a keve abis ang kata abis ia na kila using ia. ⁹Na kala antok kana keve nat i akalit ta ki usausa ta ring vul ania vei nganing a petau lava ke kimela rumrumpulit ia, ¹⁰using katala vil ato na vap duk, asukang na kana, ri vap malepen aongos kipo kun buk sigil ania. ¹¹Na si taun ang ri malanganto rikek kipo arai ania na kipo soturungai singina na kipo songosongo ta, “Numai a nat i God.” ¹²Na kapo atakun amadot iria ta ki ago ta mengen amalangas an tatana.

Iesu kata songo na 12 na igenen
(Mt 10:1-4; Lk 6:12-16)

¹³Na kala kiklak ane ring putputan, na kala songo asung na vap ang katapo buk iria, na kimela serei singina. ¹⁴Na kala atung a 12 na igenen asi kari auai ve nia, na asi kana asok aniria asi an akuskus, ¹⁵na ki atogon kitmat asi kirikai suai ani ri ingua. ¹⁶Simon, kata atuk pok ia ta Petero. ¹⁷Iakovo nat si Sebedaio, ve Ioanes tasina i Iakovo, kata atuk pok irilong ta Boanerges, supsupai ina ta nat i angang. ¹⁸Andreas na Pilipo na Bartolomaio na Mataio na Tomas, na Iakovo nat si Alpaio, na Tadaio, na Simon mangsikei i ri Kananaio, ¹⁹na Iudas Iskariot, vopo alis suai ania asi kana mat.

Iesu ve Belsebul
(Mt 12:22-32; Lk 11:14-23; 12:10)

²⁰Au, kala papok ane rina, na petau tavirimok kimela anguan serei akuvul pok an. Asukang a parik kilapa angkoai taun asi angan. ²¹Na keve

tungana kitala longong ta kapo kovek i taun i angan, na kimela serei asi kari me aiveven ania using kitala longong a mengen ta kalapo nio. ²²Vap malangas ani saupai ang le Jerusalem kita mela antok ta, “Belsebul kapo aol ia na kapo lu suai ani ri ingua ta kitmat i kari tulava ri ingua.” ²³Na kala songo asung iria na kala atatai si kankanuai i mengen asukang ke, “Kapo saka ro an ani Satan ka lu suai pok ani Satan? ²⁴Man a vap i nei vainagoan ki angvis pok, vainagoan parik kapa angkoai si tung akit. ²⁵Vo man a angtama ki angvis pok, angtama ang parik kapa angkoai si tung akit. ²⁶Asukang palau man a Satan ka angvis pok ve kana vap, kana kitmat parik kapa tung akit luai. Ka kamus. ²⁷Parik kapa angkoai si mangsikei ka palak nei lu si igenen dual na kan ainau kana keve bil, man parik kapa got tapai ani igenen dual ang. Le lak na kalapo angkoai si ainau ani keve bil i nei kana lu. ²⁸Napo mengen atutuman imi ta God ka lomom suai ani keve lau rikek na keve mengen i nau varas ri vap kipo abis ia, ²⁹sikei ninia kapo mengen i nau varas ani Malanganto Gogoai, parik kapa angkoai luai si lomom suai ani lau rikek ang. Kana lau rikek ka dokot singina si keve taun aongos.” ³⁰Using kita antok ta ingua kapo aol ia.

Rinana ve keve tasina i Iesu

(Mt 12:46-50; Lk 8:19-21)

³¹Na rinana na keve tasina kime lapo tung e komo na kila ali mengen ta kipo buk tapai ania. ³²Na petau lava kipo sinong aulitai ania, na kila antok ia, “Rinam ve keve tasim na keve taum kipo ago e komo na kipo buk ua.” ³³Na kala ngenget ta, “Si kana na rina ve keve tasig?” ³⁴Na kala ararai aulit ani vap po sinong ang, na kala antok, “Ria vang kana na rina na keve tasig. ³⁵Man a si kapo ususing kana vubuk a mamai, nia vanang kapo tasig, kapo taug na kapo rina.”

Kankanuai i mengen ani katakai i sukal

(Mt 13:1-9; Lk 8:4-8)

4 ¹Na kala anguan tutupongai akalkalit an e ngerelo na petau lava kimela serei kuvul singina, asukang a kala kokos kuli vul, na ri vap aongos kilapo ago ngerelo. ²Na kalapo akalit iria ta keve bil miang si kankanuai i mengen. Nei liuan i kana keve akalit kala atatai iria asukang ke, ³“Mi longong. Mangsikei a katakai i sukal kata sapungai ani kana keve katui i pok e matang. ⁴Na mang matan katui kanpo uak e selen na ri mani kimela angan ia. ⁵Na mang matan katui kian lapo uak si ring iatan kapo tav angkoai roe, na using parik kapa atogon roe lava kala polok sumasuma, ⁶na sinang kala ngan amak ia using kapo kovek i mis. ⁷Na mang matan katui kipo uak nei ring kakaulan na kanla polok alak ve nia na kala palun runguk ia, na parik kalapa uai. ⁸Na mang matan katui

kipo uak nei roe roron. Kipo polok alava na kipo aunai uai alava, mang matan kipo uai ta 30, na mang matan ta 60, na mang matan ta 100 alak ani keve katui i sukal ang.”⁹ Au na kala antok, “Man a si kapo atogon talinga, kapo ro ka longong!”

Lomlomoni i Iesu si akuskus si kankanuai i mengen

(Mt 13:10-17; Lk 8:9-10)

¹⁰Na e mung kata lapo ago papalik, na vap po ago kuvul ang ve nia kuvul ve 12 na nat i akalit kilapo susuai ania ta keve kankanuai i mengen ang. ¹¹Na kala antok iria, “Kakami na malangas i keve bil mumun i vainagoan si God, sikei riria e komo, kipo longong a keve bil aongos nei kankanuai i mengen, ¹²asi **kari gulegule na ki tav sabonai, na asi kari kokolongong na ki tav nas, vei ki lomom pokai na God ka lomom suai ani kari keve lau rikek.**”

Supsupai i kankanuai i mengen ani katakai i sukal

(Mt 13:18-23; Lk 8:11-15)

¹³Na kala sui iria, “Sa, parik mipa malangas a kankanuai i mengen ke? Man asukang, mi saka malangas an ani mang matan kankanuai i mengen? ¹⁴Katakai i sukal kapo sukal a mengen. ¹⁵Mang matan vap vingaria kapo bil val katui ang kapo uak e nei selen. Kipo longong a mengen na sumasuma palau Satan kamepo luk suai ani mengen i la sukal ang. ¹⁶Au na ria kita luk a katui val roe ang nei ring iatan, ria vanang kipo luk na mengen ro na kipo uruk sumasuma palau. ¹⁷Sikei using kapo kovek i mis, kana to i lomlomon kapo kudik palau. Si man a maiten vo vilvil akui kala serei singina marai mengen ro ang, kala uak sumasuma palau. ¹⁸Na katui i la uak si ring kakaulan ang, ninia kataka longong a mengen, ¹⁹sikei keve mamaiten i kuli rina ke na lomlomoni using ani tauia, na vubuk using ani mamain ta bil miang kala vil bat a mengen ro ang na kalapo kovek i uai. ²⁰Au na katui i la uak nei roe roron ang, nang ninia kapo longong a mengen na kalapo malangas ia. Na kalapo aunai uai alaba asukang ta 30 na 60 na 100 alakat ani sa i sukal ang.”

Lam ni nei avubus

(Lk 8:16-18)

²¹Na kala mengen iria asukang ke, “Au si tarapo nas ani amunai ani lam ni nei avubus vo neite pata? Parik tarapa uli atung ania si kana ring akorong? ²²Using kapo kovek ta bil katapo ago mumum, na nganlak parik kapa serei e ring malangas. Vo ta bil katapo ago nei apupung, na nganlak parik kipa ulak ia. ²³Man ta si kapo atogon talinga, kapo ro ka longong!”

²⁴Au, kala mengen iria asukang ke, “Mi lomom akit a sa mitala longong ia. Ki abis singimi angkokoai palau val lau ang mita abis ia, kuvul ve

ngaupap lava. ²⁵Using man a si kapo atogon, ki ngaupap ia, na man a si kapo atogon men lik, io, men lik ang kapo atogon ia, ki luk suai vang ania.”

Kankanuai i mengen ani katui kapo sokopolok

²⁶Na kala mengen ta, “Vainagoan si God kapo asukang val igenen kapo sukal nei kana matang. ²⁷Na kanla matav na katui ang kala sokopolok na kala polok alava. Parik kapa nas ta kapo saka polok an. ²⁸Roe papalik kapo pakangai ani katui asi kana polok na ka uai. Ainoai ina ka kovkov, le na tis. Akamusai ina kala vaba ta uai. ²⁹Sikei, taun kala matukal, nang palau kala rok ia using kalapo taun ina.”

Kankanuai i mengen ani katui i sinapeo

(Mt 13:31-32; Lk 13:18-19)

³⁰Na kala antok, “Au, tara alangtongai ani vainagoan si God ta sa? Vo tara mengen atokngai ania ta sa? ³¹Kapo asukang val katui i sinapeo. Kapo liklik luai ani keve katui aongos e kuli rina, ³²sikei man ki sukal ia ka polok na ka ngakanan ani keve sukalan aongos, angkoai si ri mani kime ting si marmarip ina.”

Selen i alis ani keve kankanuai i mengen

(Mt 13:34-35)

³³Si keve kankanuai i mengen duk asukang ke kata akus a ri vap, angkoai si kari nas. ³⁴Keve taun katapo mengen iria si kankanuai i mengen papalik. Sikei man ninia papa ve kana keve nat i akalit, kapo atatai aro iria.

Kitmat i rai kala luai

(Mt 8:23-27; Lk 8:22-25)

³⁵Si tenei ngelik vong i taun ang, kala antok iria, “Tara kokos aputuk.” ³⁶Na kila papelek a petau ang na kimela kokos ve nia, using kalapo gon kuli vul lenginang. Na mang keve vul kitapo auai ve nia. ³⁷Na mal titis kala serei amadot na to kala lak nei vul na kalapo buk gok. ³⁸Nia katapo rot kirang vangang e mung i vul. Na kila pangun ia na kila antok ia, “Katakai i akalit, parik kupa ngorem ira? Oring lik tara puka!” ³⁹Na kala tapangun na kala atakun a malu asi kana kamus, “Musik! Luai!” Na malu kala aulei na luai lava kala pitik. ⁴⁰Na kala sui iria, “Marai sa na mipo leng? Mipo kovek lak i lomlomom?” ⁴¹Na kilapo leng alava na kipo sui angpokpokai aniria ta, “Saka igenen an kana na malu ve to kipo kun longong ania?”

Iesu kata vil ato na igenen sangan ta ingua

(Mt 8:28-34; Lk 8:26-39)

5 ¹Na kianla serei e mang palpal i laman ang e palpal Geraseno. ²Na kala siang pelek a vul na mang sikei a igenen kamela duai ia le

nei gom, katapo atogon a malanganto rikek. ³Katapo uli ago nei gom, na katapo kovek i mangsikei kapo angkoai si got akit ania, kantanem a angus kitmat luai. ⁴Using amiang i taun kitapo got akit ia ta angus kitmat na voteng, sikei katapo uli tak tok ani angus, na voteng kapo vil meng ia. Katapo kovek ta mang sikei kapo atogon dual angkoai asi teng akit ania. ⁵Si keve taun tenei ias ve tenei vong kapo uli kup alava pulakai nei gom na kuli keve putput. Na kapo lamut pok a pukun ina ta iat. ⁶Si vuk taun ang kamela arai ani Iesu e ring vunga, kala sang asiang taun ia na kanla soturungai singina. ⁷Na kala kup velai ani kapo songosongo alava ta, “Iesu, nat i God lakat luai, kupo serei asi kam me vil sa anig? Napo sokotuk akitmat ua e matana i God ta ku ago ta vil akui an anig.” ⁸Using kataala antok ia ta, “Malanganto rikek, ku soung pelek a igenen ke!” ⁹Au kala sui ia ta, “Kam asan ta si?” Na kala polpol ta, “Kag asan ta petau using namempo miang.” ¹⁰Na kapo sokotuk ia asi kana ago ta kirikai an aniria pelek a ring ang.

¹¹Mang takaman vongo lava kitapo susuang angasungai i ring ang ngere put, ¹²au na kila sokotuk ia, “Ku asok imem taun a takaman vongo suke ani namem an palak singiria.” ¹³Na kala ainak aniria. Au, keve malanganto rikek ang kila soung na kianla palak si keve vongo ang. Ria aongos, kipo asukang ta 2,000, kila doso asiang taun a ring karkadapan na kianla lus mat. ¹⁴Na vap po aiveven vongo ang kila sip na kianla akus nei rina lava na nei keve rina lik. Na ri vap kila pasal asi kari an arai ani sa kataala serei. ¹⁵Na kimela serei si Iesu na kila arai ani vo sangan ta ingua ang kapo sinong, na kalapo kavat, na kalapo vangang tapalas aro pok, nang a igenen ang petau katapo ago singina, na kilapo leng. ¹⁶Na vap arai ang kila akus iria ta nem ang kata serei si igenen sangan ta ingua ang na ri vongo. ¹⁷Na kilapo sokotuk ia asi kana pasal suai ani kari rina. ¹⁸Au kalapo kokos na igenen ang ri ingua kitapo aol ia, kala sokotuk ia asi kana auai ve nia, ¹⁹sikei parik kapa ainak ania na kala antok ia ta, “Ku papok ane rina taun a keve tungam na ku antok iria ta poisan a nem roron Volava kataala abis ia singim na kata saka ngorem an anim.” ²⁰Au kala pasal na kanlapo akuskus amalangas nei palpal i Dekapolis ta poisan a nem roron a Iesu kataala abis ia singina. Na ri vap aongos kilapo nagat.

Kavulik mat na aina malepen

(Mt 9:18-26; Lk 8:40-56)

²¹Na Iesu kala paputuk pok kuli vul ane mang palpal na vap duk kimela serei akuvul singina e ngerelo. ²²Na mang sikei a ainoinoai i nei lu i kivung, kana asan ta Iairo, kala serei na kala arai ania na kamela matung turung e ngono kakina, ²³na kala sokotuk ia ta, “Kag kavulik lik kalapo ore asi kana mat. Ku me na kuan amatung a kungam singina asi kana to pok na ka ago aro.” ²⁴Au kala pasal kuvul ve nia.

Na petau lava kila rumrumpulit using aliu ia. ²⁵Na mang sikei a aina, katapo uli malepen ta tongmasik asukang ta 12 na matas aongos, ²⁶na kataala pasal taun a keve katakai i vilvil ato duk, na kataala amun aongos kana togtogon, sikei kana malepen kalapo rikek luai ani aino. ²⁷Na kataala longong na akusku i Iesu, na kala gingging kolotai alak ania na kanla sigil kana vakup, ²⁸using kapo lomlomonai ta, “Man naka sigil lik palau kana vakup, nala roron pok.” ²⁹Na akorong palau tongmasik ang kala sal tok na kala nasai ania ta pukun ina kalapo kala pelek na malepen ang. ³⁰Na Iesu kala nas ta kitmat ina kala sounge pelek ia na kala tapuk ngules nei liuan i petau ang na kala sui, “Si kata sigil kag vakup?” ³¹Na kana keve nat i akalit kila antok ia, “Kupo nas ta kana na petau lava kipo rumrumpulit ua, na kupo sui ta, ‘Si kata sigil iau?’” ³²Na kala tun aulitai asi kana nas ta si nang kata mela sigil ia. ³³Au na aina ke kalapo nas ta kalapo ro, na kalapo tek lengai palau na kamela matung turung e matana, na kala mengen amalangas ia ta keve nem tutuman aongos. ³⁴Na kala antok ia ta, “Kag kavulik, kam lomlomon kala vil ato pok ua. Pasal ta marip. Kam malepen kala tagon.”

³⁵Vuk taun ang kapo mengen lak, na mang matan vap i nei lu si ainoinoi ang kimela serei na kila mengen ta, “Kam kavulik kala mat. Ago ta mang atelan an ani katakai i akalit.” ³⁶Iesu parik kapa telan ta kari ainasai, sikei kala antok a ainoinoi ang ta, “Ku ago ta leng an, sikei ku lomlomon.” ³⁷Na kala tubat iria ani ka ago ta sikei ka using ia, sikei ri Petero ve Iakovo na Ioanes tasina i Iakovo, ritol papalik. ³⁸Au, kianla serei si lu si ainoinoi ang, na kanla arai ani loek lava na radaupa. ³⁹Na kala riuk lak na kala antok iria ta, “Loek na tangis ke i sa? Kavulik ke parik kapa mat. Kapo rot palau.” ⁴⁰Na kila los ia. Sikei kala asok suai aongos aniria ane komo, na kala songo na tamana ve rinana i kavulik ang, kuvul ve volo nat po auai ang ve nia, na kala palak taun a kavulik ang. ⁴¹Na kala teng a kungana na kala antok ia ta, “Talita koum.” Supsupai ina ta “Kavulik lik, napo antok ua, ku tadut.” ⁴²Akorong palau na kavulik ang kala tadut na kalapo pasal, using kata lapo 12 kana matas. Na kila taping alava luai. ⁴³Na kala atakun akit iria ta ka ago ta mangsikei ka nas a nem ke, na kala antok iria asi kari ali pok ania.

Ri Nasaret kita kirikai ani Iesu

(Mt 13:53-58; Lk 4:16-30)

6 ¹Na kala papelek a rina ang ane si kana rina akorong, na kana keve nat i akalit kila auai ve nia. ²Na si taun i atailai kanla vil akalit nei lu i kivung. Vap miang kila longong kana akalit na kipo taping. Kipo sui asukang ke, “Igenen ke kata luk a keve mengen ke le voi? Nas ke kapo ago singina, kapo saka nas an? Si saka kitmat an na kapo vil a keve bil i vilvil ataping ke? ³Parik kana na katakai i abis lu ke, rinana ta Maria,

na keve tasina ta Iakovo, Ioses, Iudas na Simon, na parik ta keve tauna kana kapa ve tara?" Na kilapo savang singina. ⁴Na Iesu kala antok iria ta, "Katakai i kus amalangas, vei kavpo atogon asan si mang keve rina, sikei si kana rina akorong, nei liuan i kana patvap na mete kana lu, parik." ⁵Au, na e iang parik kata lapa angkoai si abis ani keve kitmat i bil i vilvil ataping, sikei kala amatung a kungana si rukun lik palau na kala vil ato iria. ⁶Kapo taping alava using parik kipa lomlomon.

Iesu kata asok a 12 na nat asi an abis

(Mt 10:1,5-15; Lk 9:1-6)

Na kala pasal aulit e iang si keve rina si kana akalit ani ri vap. ⁷Na kala songo asung a 12 na nat ang, na kala asok pongpongua iria na kala alis iria ta kitmat asi kirikai ani ri malanganto rikek. ⁸Na kala pini akit iria ta ki ago ta teng an ani mangsikei a bil, sikei a kipa papalik. Pok ka ago, tepe ka ago, na kapkap nei laka kapa ka ago. ⁹Sikei ki alak a pauk i kak, na ki ago ta alak an ta lapongua i siot. ¹⁰Na kala antok iria, "Man mi ago nei mangsikei a lu, mi ago akorong e iang, tung si taun ang mi papelek pok a rina ang singina. ¹¹Man a mang rina ki tav ainak animi na kipo misag ani longong animi, taun mila soung, mi tapngai suai ani kaponpon e kakimi, asi akalit amalangas aniria ta kari lau rikek." ¹²Asukang na kila pasal na kianla akusku ani ri vap ki lommon pokai. ¹³Na kianla kirikai suai ani mamain ta ingua, na kianla tiu a mamain ta vap malepen ta rul i elai na kila vil ato iria.

Kita vil punuk a Ioanes katakai i asing tauia

(Mt 14:1-12; Lk 9:7-9)

¹⁴Na tulava Erodos kala longong a keve nem ke using a asan ina kilapo malangas pulakai ania. Mang matan kilapo mengen ta Ioanes katakai i asing tauia kala to pok. Tukulai ina kapo atogon a kitmat ke asi vil ani keve nem ke. ¹⁵Na mang matan kipo mengen ta nia nang a Elias. Na mang matan kipo kun antok ta kapo katakai i kus amalangas asukang val keve katakai i kus amalangas ang aino. ¹⁶Sikei Erodos kala longong na kala antok ta, "Ioanes nau natala lam rongok ia, sikei kana kala to pok." ¹⁷Using Erodos katakai asi teng akit ani Ioanes na ki got ia na alakai ania nei lu i akangbat. Tukulai ina si Erodias, kisngana i tasina Pilipo, using kata lapo osongon ia. ¹⁸Using Ioanes katapo uli mengen ani Erodos ta, "Parik kapa korong ta ku osongon pok kana aina na tasim." ¹⁹Na Erodias kala marala ia na kalapo atogon a vubuk ani ka mat, sikei parik kapa angkoai, ²⁰using Erodos kapo leng ani Ioanes using kapo nas ta kapo igenen korong na daus kapa. Asukang na kala aiveven aro ia. Katapo mangal kana keve mengen na katapo uli buk longong ania kantanem katapo vinga bungus ania. ²¹Sikei si mangsikei

a taun, Erodes kala vil kana matan angan i ingus ania na kala songo kana keve ainoinoai na keve vap i visvis na keve vap posongan i Galilaila. ²²Na si taun ang a kavulik ang si Erodias kame lapo mika e mataria na Erodes kuvul ve vap lava ang kilapo mangal ia. Au na tulava kala antok a kavulik ang ta, “Man kupo buk ta mang nem ku posong ia na naka alis ua tatana.” ²³Kala atuvala ta, “Tutuman luai, naka alis ua ta saka nem an man ku aikut ia. Man kupo buk a palpal lava i kag togtogon naka alis ua.” ²⁴Au, kala soung na kanla sui a rinana ta, “Au, saka nem an kana naka aikut ia?” Na kala antok ia ta, “Vangang i Ioanes.” ²⁵Na kala sang alak pok na kala antok ta, “Kana palau akorong ku alis iau nei gapai ta vangang i Ioanes katakai i asing tauia.” ²⁶Na tulava kala vinga makus alava, sikei using kataala atuvala tatana, na keve vap lava kipo sinong, asukang na parik kapa angkoai si misag ani sa kataala posong ia singina. ²⁷Asukang a tulava kala asok a ararai bat ta kan luk le na vangang ina. Na kanla lam rongok a ngona nei akangbat, ²⁸na kamela serei ta vangang ina nei gapai, na kala alis ia si kavulik ang, na kavulik ang kala alis ia si rinana. ²⁹Na kana keve nat i akalit kila longong na kimela asalak le na pukun ina na kianla amatung ia nei mata i mat.

Iesu kata amasung a petau tavirimok

(Mt 14:13-21; Lk 9:10-17; Io 6:1-14)

³⁰Na keve aposel ang kimela serei akuvul pok si Iesu na kimela akus ia ta sa kita vil ia na sa kita akalit tatana. ³¹Na kala antok iria, “Mi me. Tara pasal akipai papalik ane si ring vauvau asi an ausai tapai.” Using vap miang kitapo pasal angpok pulakai na parik kipa angkoai taun asi ago aro vo angan kapa. ³²Na kila kokos kuli vul na kila pasal ane si mang ring vauvau si an ago papalik. ³³Sikei vap miang kila arai kinle aniria, na kila sang e selen palau le nei keve rina aongos, na kianla serei aino aniria. ³⁴Na kanla siang sabonai ani vap duk, na kalapo ngorem iria using kipo asukang ta ri sipsip kovek i vo aiveven aniria. Na kala tutupongai asi kana mengen akalkalit aniria ta keve bil miang. ³⁵Na kala ngelik na kana keve nat i akalit kimela serei singina na kila antok ia ta, “Ring ke kapo vauvau na kalapo angasungai a vong. ³⁶Asok iria taun a mang keve rina asung asi kari an samui ta kari pok asi angan.” ³⁷Sikei kala antok iria ta, “Nami akorong mi li pok iria.” Na kila sui ta, “Au, kupo buk ani namem an samui pok ta kapkap tavirimok asi kamem alis aniria tatana?” ³⁸Na kala sui iria ta, “Mipo togon a poisan a saui? Mianla arai tapai.” Na kianla arai tapai na kimela antok ia ta, “Palpalima, na pongua na ien kapa.” ³⁹Na kala asok iria aongos ta ki sinong si kuvkuvulan si ring ro. ⁴⁰Na kila sinong angusing si kuvkuvulan. Mang matan si kuvkuvulan i 100 na mang matan si kuvkuvulan i 50. ⁴¹Na kala luk a palpalima na saui ang na pongua na ien na kala tarak ane metekuku,

na kala posong aro ia, le na kala tevetevek a saui ang dong a keve nat ang asi kari lilis aliu ani ri vap tatana. Na kala kun abis ania asukang si ngono ien ang kapa. ⁴²Na riria aongos kila angan na kila masung aro. ⁴³Na kila lukluk akuvul a keve inongos i saui ve ien na kila asiang aduk a 12 na tepe lava tatana. ⁴⁴Na vap tauan ang kita angan, tataot iria katapo 5,000 aongos.

Pasal kuli laman

(Mt 14:22-33; Io 6:15-21)

⁴⁵Akorong palau kala asok kana keve nat i akalit ta ki kokos aputuk aino ane Betsaida na nia asi kana asok suai tapai ani petau ang. ⁴⁶Na kala posong atung suai tapai aniria na kala kik lak ane kuli putput asi kana an sokotuk. ⁴⁷Na kala saguppupan, na vul kanlapo ago nei liuan i laman, na nia papalik lak e ring kolo. ⁴⁸Na kala arai ta kipo abis alava si kalip using kipo suak a malu. Si tapading i tangat kala pataun iria na kapo pasal aliu kuli laman, asi kana an liu tul aniria. ⁴⁹Sikei kila arai ania si po pasal kuli laman ang na kila sekpat ta ingua, na kila angaloiai i leng. ⁵⁰Using riria aongos kitala arai ania na kila leng alava. Sikei akorong palau kala mengen iria na kala antok ta, “Akos. Nau palau kana. Mi ago ta leng an.” ⁵¹Na kala kokos ve ria na malu ang kala aulei na kipo tapping velai ani sugul ⁵²using parik kipa lomlomoni akit ani saui ang kita angan ia. Vangang iria kapo tav tapalas aro.

Iesu kata vil ato ri vap malepen e Genesaret

(Mt 14:34-36)

⁵³Au, kila paputuk luai ane mang palpal na kianla ung alak e Genesaret, na kila rukang. ⁵⁴Na taun ang kila siang, ri vap kila arai kinle ania, ⁵⁵na kila sang ang taliungai taun a matan rina asung na kianla asalak le na mamain ta vap malepen kuli pata taun a rina ang kitala longong ta kapo ago singina. ⁵⁶Na e voi pulakai, si rina lik vo rina lava na mang matan ring katan serei singina, kitapo amatung kari keve vap malepen nei vaia, na kila sokotuk ia asi kana ainak ani ki sigil na ngising palau i kana vakup. Au na taun ang kian lapo sigil ia, ria aongos kilapo to.

Akalkalit si ri vap lava aino

(Mt 15:1-20)

7 ¹Ri Parisaio kimela serei singina kuvul ve mang matan vap malangas ani saupai le Ierusalem, ²na kila arai ani kana keve nat i akalit si po angan tav sunep kunga aro aino val kapo ro val kari saupai. ³Using ri Parisaio ve ri Iudaia aongos kipo usiusing a akalit si ri vap aino ta man parik kipa sunep aro aino ki ago ta angan an. ⁴Na ki ago kapa

ta angan an ani pok kita samui ia nei ring i atos man parik kitapa galui adaus aro aino ia. Na kapo atogon mang matan saupai duk kipo using ia val galui aro ani kap, avubus, gapai, vebe na pata. ⁵Au, na ri Parisaio na vap malangas ani saupai ang kila sui ia ta, “Au kapo sa na kam keve nat i akalit parik kipa using a lauluan si keve tivura na kipo tav sunep aro aino tapai na ki angan?” ⁶Na kala antok iria, “Esias kata kus amalangas aro ta nami na vap kapau, val nei salsalik ta, **Vap ke kipo mamaila anig ta ngururia palau, sikei nei pakangat iria kipo ago avunga luai anig.** ⁷**Kipo soturungai kapau palau singig. Na kipo mengen alava ta kari keve lomlomonai palau asukang val kapo akalkalit tutuman.** ⁸Mipo lakau na asok tapai si God na milapo kolai ania ta lauluan si ri vap.” ⁹Na kala mengen iria, “Mipo katak aro luai asi kami gel ani kana saupai a God na mipo ususing kami lauluan akorong. ¹⁰Arai, Moses kata antok ta, **Ku mamaila ani tamam ve rinam, na si kapo mengen arikek ani tamana ve rinana, nia asi mat.** ¹¹Sikei nami mipo antok ta man a si kapo antok a tamana ve rinana ta kana keve bil asi pakangai aniria kapo Korban, nang supsupai ina ta katala alis ia ane si God, ¹²e iang mila atakun ia asi kana ago ta abis ani lau ro ani tamana ve rinana. ¹³Sukana, milapo lomlon apalau na mengen si God, using mipo teng akit si kami keve sausaupai. Na mang keve bil duk kapa mipo vil ia asukang.”

¹⁴Na kala songo akuvul pok a ri vap na kala antok iria, “Nami aongos, mi longong iau na mi malangas. ¹⁵⁻¹⁶Nem kapo pasiang nei vinga parik kapa angkoai si vil avisuk ani igenen. Sikei sa kapo soung le neina, nia vanang kapo vil avisuk ia.” ¹⁷Na kala papelek a petau ang ane nei lu na kana keve nat i akalit kila sokotuk ia ta ka atatai amalangas iria ta kankanuai i mengen ke. ¹⁸Na kala antok iria ta, “Nami kapa mipo tav malangas? Sa, parik mipa malangas ta sa kapo pasiang nei vinga parik kapa angkoai si vil avisuk ani igenen? ¹⁹Using parik kapa pasiang asi kana an ago akit, kapo pasiang ane nei vinga le na kanpo soung suai pok.” Si oring ke katapo mengen amalangas ta mamain ta pok aongos kipo ro asi angan. ²⁰Na kala antok, “Sa kapo soung le neina i igenen, nia vanang kapo vil visuk ia. ²¹Using le nei vinga keve lomlomonai rikek ki serei val panik, ainau, daung, ²²putuk osongon, neikitung na mang matan lau rikek. Kapau, asosol, mangal musik, mengen musik, alalakas na nio. ²³Ria aongos na keve lau rikek ke kipo ago nei vinga nang kipo vil avisuk a igenen.”

Lomlomon si aina le Suropoinikis

(Mt 15:21-28)

²⁴Au, kala papelek a rina ang na kala pasiang taun a palpal i Turo. Na kanla riuk lak nei mang lu amunai ani ki ago ta arai ania, sikei parik kapa angkoai si ka ago mumun. ²⁵Sikei, mang aina, kana kavulik

malanganto rikek katapo aol ia, kala longong ta kapo ago, na sumasuma palau kamela serei singina na kamela oroturung e ngono kakina. ²⁶Aina ke kapo ainan Elas, na kana rina e palpal Suropoinikis, na kala aikut ia si kana lu suai ani ingua ang pelek kana kavulik. ²⁷Na kala antok ia ta, “Angangan amasung aino na ri nat lik using parik kapa ro asi luk ani pok si ri nat lik na apus ani kauvek tatana.” ²⁸Na kala antok ia, “Kapo ro volava, sikei apok ri kauvek neite pata kipo nas ani angan ani inongos i pok si ri nat lik.” ²⁹Na kala antok ia ta, “Using kupo mengen asukang, ku papok. Ingua ang kala papelek kam kavulik.” ³⁰Au kala papok ane nei lu na kanla serei sabonai ani kana kavulik kapo matung kuli pata na ingua ang kala kovek.

Iesu kata vil ato na tapo

³¹Na kala anguan tadut pelek pok an ani palpal i Turo, na kala palak ane Sidon na kala paliu asi kana an serei si laman tatapulitai, Galilaia, na kapo paliu nei palpal Dekapolis. ³²Na kianla songo dong ia ta mang igenen katapo talinga bot na kapo tava ani mengen. Na kila aikut ia ta ka amatung a ngono kungana singina. ³³Na kala songo papalik akipai ania pelek a petau lava ang na kala atung a piupiu i ngono kungana nei ngono talingana na ka kanus na kala sigil a kalkalame ina. ³⁴Na kala tarak alak ane metekuku na kala aus asinong na kala antok na igenen ang ta, “Epata.” Supsupai ina ta “Tavas.” ³⁵Na talingana kala tapalas na kalkalame kudik ang kala ro na kana mengen kala saling aro. ³⁶Na kala sokotakun a vap ang ani ki ago ta akus an tatana. Sikei, kantanem kata atakun amadot iria, kila akuskus alava. ³⁷Na kipo taping alava luai na kipo mengen ta, “Keve bil aongos kapo vil ia kapo vil aro palau iria. Kapo iton a ri tapo asi kari mengen na ki longong korong kapa.”

Iesu kata amasung a petau tavirimok

(Mt 15:32-39)

8 ¹Si pangau i taun ang, mang petau lava kimela serei akuvul pok, na kitapo kovek i pok, na kala songo akuvul kana keve nat i akalit na kala antok iria ta, ²“Napo ngorem a petau ke using lenginang kitala ago na potol a taun ve nau, na kipo kovek i pok. ³Man naka asok suai palau aniria velai ani buk angan, kianla ngau alava e selen using mang matan iria le ring vunga.” ⁴Na kana keve nat i akalit kila sui ia ta, “Au, tara luk pok e voi aniria? Using a ring ke kapo ring palau.” ⁵Na kala sui iria ta, “Poisan a saui nang mipo atogon ia?” Na kila antok ta, “Limalengua.” ⁶Au na kala asok na petau ang asi kari sinong aongos e vunep, na kala luk a limalengua na saui ang na kala posong ro, na kala tevek ia na kalapo alis ia si kana keve nat i akalit asi kari sasagi ani ri vap tatana, na kilapo lilis a petau ang tatana. ⁷Kitapo atogon a rukun ien lik kapa na kala kun posong ro singina na kala asok iria ta ki kun tavai kapa ania. ⁸Na kila angan na kila masung. Au na kila

lukluk akuvul na keve inongos i pok ang na kala serei asukang ta limalengua na tepe duk. ⁹Kitapo asukang ta 4,000 na vap aongos. ¹⁰Na kala asok suai aniria, na kala kokos kuli vul ve kana keve nat i akalit na kila pasal ane palpal Dalmanuta.

Kipo buk ta akanangai

(Mt 16:1-4)

¹¹Na ri Parisaio kimela serei asi kari anggegelai ve nia, na kila asok ia ani ka abis a mangsikei a akanangai le metekuku, asi kari atokngai ania. ¹²Na kala aus asinong na kala antok ta, “Ani sa na polpolokan i taun ke kipo buk a akanangai? Napo mengen atutuman luai animi ta ka kovek luai ta mang akanangai ani polpolokan ke.” ¹³Na kala papelek iria na kala kokos aputuk kuli vul ane mang palpal.

Yeast si ri Parisaio ve Erodes

(Mt 16:5-12)

¹⁴Kitala lomom taun ani luk saui le. Ring sikei palau katapo sinong kuli vul. ¹⁵Na kala antok akit iria ta, “Mi arai aro na mi aiveven imi pelek a yeast si ri Parisaio na si Erodes kapa.” ¹⁶Na kilapo angmengenai musik ta, “Tarapo kovek i saui.” ¹⁷Sikei Iesu kalapo malangas ia na kala sui iria ta, “Sa tukulai ina na mipo angmengenai ta mipo kovek i saui? Sa, parik mipa malangas lak? Mipo kovek i nas lak? Vei vingami kavpo tabat nganing?” ¹⁸Mipo atogon mata sikei mipo tav arai. Mipo atogon talinga kapa sikei mipo tav longong. Sa, parik mipa lomom akit ¹⁹a taun ang nata tevek a palpalima na saui dong a 5,000 na vap ang singina? Poisan a tepe lava mita asiang aduk ia ta inongos i pok?” Na kila antok ia ta, “¹².” ²⁰“Au na limalengua na saui ani 4,000 na vap ang, poisan a tepe lava mita asiang aduk ia?” Na kila antok ia ta, “Limalengua.” ²¹Na kala sui iria ta, “Mipo kovek i nas lak?”

Iesu kata vil ato na igenen mata ba e Betsaida

²²Na kianla serei e Betsaida na mang vap kila songo dong ia ta mang igenen ba na kila sokotuk ia ta ka sigil ia. ²³Na kala teng a kungana i ba ang na kala ausingai asoung ania pelek a rina. Na kala kanus dong a matana na ka amatung lakat a kungana singina na kala sui ia ta, “Kupo arai korong ta ring bil?” ²⁴Na kala gelegelep na kala antok ta, “Napo arai ani ri vap, sikei kipo bil val ri e kipo pasal.” ²⁵Na kala amatung pok a kungana e matana, na kala arai akit, kala tapalas a matana na kala ararari aroron luai. ²⁶Na kala asok ia taun kana lu velai ani kala atakun ia ta, “Ku ago ta an serei an e nei rina.”

Petero kata mengen amalangas ta Iesu

(Mt 16:13-20; Lk 9:18-21)

²⁷Na Iesu kala pasal aliu ve kana keve nat i akalit ane si mang keve rina e Kaisareia Pilipo. E nei selen kanlapo sui kana keve nat i akalit ta,

“Ri vap kipo kin iau ta nau a si?” ²⁸Na kila antok ia ta, “Ioanes, katakai i asing tauia, na mang matan kipo antok ta Elias, na mang matan ta mangsikei iria mamain ta katakai i kus amalangas.” ²⁹Na kala sui iria ta, “Au, na nami, mipo kin iau ta nau a si?” Na Petero kala ngenget ia ta, “Numai a igenen i akanangai.” ³⁰Na kala sokotakun iria ta ki ago ta antok an ani mangsikei tatana.

Iesu kapo mengen aino ta ka mat na ka tadut pok

(Mt 16:21-28; Lk 9:22-27)

³¹Na kalapo mengen i amalalangasai aniria ta igenen i pukun ka sunguk a keve vilvil akui miang, na ri vap lava na keve ainoinoai si ri katakai i sula ve ri vap malangas ani saupai ki misag ania na ki raung ia, na e mung i potol a taun, ka tadut pok. ³²Na katapo mengen amalangas aroron luai aniria. Na Petero kala songo ia ane ngising na kanlapo tatapokai ania. ³³Sikei kala taval na kala arai ani kana keve nat i akalit na kala tatapokai ani Petero ta, “Pasal e mung ig, Satan. Using parik kupa auai ve lomlomonai si God, sikei kupo auai ve lomlomonai si ri vap.” ³⁴Na kala songo asung ri vap kuvul ve kana keve nat i akalit na kala antok iria ta, “Man a mangsikei kapo buk using anig, ka uli auak suai ani lomlomonai ania pok, na ka asalak kana ngakputuk na ka using iau. ³⁵Using ninia kapo buk aiveven aroron ani kana to, ka amun ia. Sikei ninia kapo amun kana to anig na ani akus ro, ka teng ia. ³⁶Using man a igenen ka atogon a keve bil aongos kuli rina na ka mat, keve bil ang ki saka pakangai ania? ³⁷Arai, tara samui pok kara to ta sa? ³⁸Using man a sikei kapo mumurung anig na ani kag mengen, nei liuan i vap putuk osongon ve bil arikek i taun ke, igenen i pukun kapa ka kun mumurung ania si taun man ka serei pok ta miminaungan i tamana ve mamain ta angelo

9 daus.” ¹Na kala antok iria, “Napo mengen atutuman luai animi ta mang matan kana kipo tung e ke, parik kipa mat tung si ki arai ani kana vainagoan a God kame serei ta kitmat.”

Ararai i pukun i Iesu kala sakol

(Mt 17:1-13; Lk 9:28-36)

²Na kala liu tapai a limalesikei a taun na Iesu kala songo le na ri Petero ve Iakovo na Ioanes, ritol papalik, na kala ainoai alak aniritol ane si mangsikei a put lakat. Na kanla sakol e mataritol. ³Na kana maus vo la mang posok luai, tav angkoai ve mangsikei i kuli rina kapo galui vakup asukang. ⁴Na Elias ve Moses kilongla tu aserei na kilongmela angmemengenai ve Iesu. ⁵Na Petero kala antok a Iesu ta, “Kapo ro anira si me ago e ke. Namemtol atung ta potol a ralai, ta sikei anim, na mang sikei ani Moses na ta mang anu ani Elias.” ⁶Using parik kapa nas ta ka

saka mengen an, using kitolpo leng arikek. ⁷Na mang kuku kamela apung iria. Na kalinga kala mengen nei kuku, “Kana kag nat ro, napo buk alava ia, mi longong ia.” ⁸Akorong palau na kitola anguan ararai an, na kitola tav arai ani mang si ve ritol, Iesu papalik. ⁹Au na taun kitolapo kik siang pok pelek a kuli put ang, kala atakun iritol ta kitol ago ta antok an ani mang anu ta saka nem an kitoltala arai ania tung si igenen i pukun kala tadut pelek a mat. ¹⁰Asukang a kitola teng akit a mengen ke na kitolpo sui angpokpokai aniritol ta supsupai i vuk mengen ke tadut pelek pok ani mat. ¹¹Na kitola sui ia ta, “Au, marai sa na vap malangas ani saupai kipo antok ta Elias kame serei aino tapai?” ¹²Na kala antok iritol ta, “Elias kame serei aino ani kame vil aro na keve bil aongos. Marai sa kita salik ia ta igenen i pukun ka kui alava na ri vap asi kari kirikai ania? ¹³Sikei napo antok imi ta Elias lenginang kata mela serei, na kitapo vil a keve lau rikek e matana si selen ang riria akorong kitapo uruk singina, asukang val mengen i salsalik kapo mengen tatana.”

Iesu kata vil ato na nat ingua kata aol ia

(Mt 17:14-20; Lk 9:37-43a)

¹⁴Na kitolanla serei si keve nat i akalit sabonai ani petau lava si po ago kuvul ve ria, na mang keve vap malangas ani saupai kilapo anggegelai ve ria. ¹⁵Na petau ang kila arai ania na kipo taping arikek na kila sang kamakamal ia na ki lulun ia. ¹⁶Na kala sui iria, “Mipo anggegelai kana ta saka nem an ve ria?” ¹⁷Na mangsikei a igenen nei liuan i petau ang kala ngenget ia asukang ke ta, “Katakai i akalit, natame serei singim ta kag nat, using a ingua kapo aol ia na kapo tav mengen. ¹⁸Keve taun, man a ingua ka serei singina, kapo so tatana ane vunep, rere kapo siang e amangana na kapo ngut ngisa, na kapo amadot a pukun ina. Natala sokotuk kam keve nat i akalit asi kari lu suai ania sikei parik kipa angkoai.” ¹⁹Na kala antok iria ta, “Nami na matan polpolokan tav lomlomon. Poisan lak a taun si kag ago ve nami? Poisan lak a taun si kag telan tatami? Sunguk ia ane singig!” ²⁰Au, kila sunguk ia na akorong palau si vuk taun ang ingua ang kala arai ania na kala so angpok pulakai ta nat ang ane vunep na kapo saul angpok velai ani rere i mat. ²¹Na kala sui a tamana ta, “Poisan a taun katala bil asukang ke?” Na kala antok ia ta, “Le si liklik. ²²Taun miang ingua ke kapo buk raung punuk ania na mang matan taun kapo so tatana ane nei kut na ane nei laman kapa. Man kupo angkoai si pakangai animem, kapo ro, ngorem imem.” ²³Na Iesu kala antok ia ta, “Man kupo angkoai? Keve bil aongos nang kapo angkoai man kupo lomlomon.” ²⁴Akorong palau na tamana i nat ke kala songosongo ta, “Napo lomlomon, ku pakangai ani kag lomlomon using kapo liklik!” ²⁵Na Iesu kala arai ta petau ang kime lapo duk na kala kirikai suai ani ingua ang,

“Numai, ingua vil apo ang, ku sounge pelek ia! Ku ago luai ta anguan aol an ania!” ²⁶Na kala kup alava na ka anguan so pok an tatana na kala sounge pelek ia. Na nat ang kalapo matung val igenen la tapikon. Na amiang iria kilapo antok ta kala mat. ²⁷Sikei Iesu kala teng ia e kungana na kala tadut. ²⁸Au na kala palak nei lu na kana keve nat i akalit kianla sui papalik ia ta, “Sa tukulai ina na parik namemtapa angkoai si lu suai ania?” ²⁹Na kala antok iria ta, “Si sokotuk papalik tarapo angkoai si lu suai ani anu asukang ke.”

Iesu kata vapongua i mengen ta ka mat na ka tadut pok

(Mt 17:22-23; Lk 9:43b-45)

³⁰Na kila papelek a rina ang na ki paliu e Galilaia. Parik kapa ainak ta ki nas ta kalapo ago e iang, ³¹using kapo buk atatai ani kana keve nat i akalit asukang ke ta, “Igenen i pukun ki alis suai ania e kungaria i ri vap na ki raung ia na e mung i potol a taun ka tadut pok.” ³²Sikei parik kipa malangas ta supsupai i mengen ang, na kipo lolokovo si sui ania tatana.

Si kapo aino?

(Mt 18:1-5; Lk 9:46-48)

³³Na kianla serei e Kaparnaum na e nei lu kala sui iria ta, “Mitapo anggegelai ta sa nang e selen?” ³⁴Sikei parik kipa ngenget ia using kitapo anggegelai e selen ta si iria kari ainoinoi. ³⁵Na kala sinong na kala songo na 12 na nat i akalit na kala antok iria ta, “Man a igenen kapo buk asi kana ainoinoi, ka igenen palau, na ka asosokai si ri vap.” ³⁶Na kala songo na mang nat lik na ka atung ia nei liuan iria na ka sovai ia na kala antok iria ta, ³⁷“Si kapo ainak ani sikei a nat lik asukang ke si asan ig, e iang kapo ainak anig. Na si kapo ainak anig, parik kapa ainak anig, sikei kapo ainak ani vo asok ang anig.”

Si kapo tav tubat anira kapo tung ve tara

(Lk 9:49-50)

³⁸Na Ioanes kala antok ia ta, “Katakai i akalit, namemta arai ani mang igenen katapo kirikai suai ani ingua si asan im, sikei namemta atakun ia using parik kapa mangsikei ira.” ³⁹Sikei Iesu kala antok iria ta, “Mi ago ta atakun an ania. Arai, man a mangsikei kapo vil a bil i vilvil ataping si asan ig, parik kapa angkoai si mengen arikek sumasuma anig, ⁴⁰using man a si kapo tav tubat anira, kapo tung ve tara nang. ⁴¹Using napo mengen atutuman luai animi ta man a si ka alis imi ta men laman asi inum, using mipo sunguk a asan i igenen i akanangai, tutuman luai parik kapa angkoai si ngau kap ani kana seupok.

Uak si lau rikek

(Mt 18:6-9; Lk 17:1-2)

⁴²Man a si ka asavang a sikei i keve nat lik ke, ka pen ro ania man ki pala a iat maiten e ngona na ki asuai ania nei laman. ⁴³⁻⁴⁴Man a mang

palpal kungam kata la vil ua si uak si lau rikek, ku li tok suai ania. Kapo ro ta ku palak si to asikei ta sikei a pal kunga palau, vei la asuai anim ve ngono kungam aongos nei kut lava i saupai, si kut ang kapo ni asikei. 45-46 Na man a mang palpal kakim kata la vil ua si uak si lau arikek, ku lam putuk suai ania. Kapo ro ta ku palak si to asikei ta sikei a pal kak palau, vei la asuai anim ve ngono kakim aongos nei kut lava i saupai. 47 Na man a mang palpal matam kata la vil ua si uak si lau rikek, ku ruvel suai ania. Kapo ro ta ku palak nei vainagoan si God ta sikei a palpal mata palau, ani ki asuai anim ve ngono matam aongos nei kut lava i saupai, 48 si ring ang ri kanipa ki se asikei a pukun iria singina na kut ang parik kapa angkoai si mat singina. 49 Arai, ri vap aongos, kut ka ni adaus iria val makasim. 50 Makasim kapo bil ro. Au na man a makasim kala tamus a namin ina, mi saka vil anaminan an pok ania? Kapo ro ta makasim ka ago singimi na mi ago kuvul si marip.”

Lau i putuk osongon

(Mt 19:1-12)

10 ¹Na kala papelek a ring ang ane palpal Iudaia na kala paputuk a sung ang Iordanes. Na petau lava kimela serei pok singina na kala akalit iria val kapo uli vil ania. ²Na mang matan Parisaio kitapo buk atokngai ania na kila sui ia ta, “Au si kara saupai kana kapo ainak ani tauan asi kana asuai ani kana aina?” ³Na kala sui pok iria ta, “Moses kata alis imi ta saka saupai an?” ⁴Na kila antok ia ta, “Moses kata ainak ani **tauan ka salik kana mengen i misag, le na ka asuai ania.**” ⁵Sikei Iesu kala antok iria ta, “Using a vingami katapo kitmat, na kata alis imi ta saupai ang, ⁶sikei le kabang le si taun i asisinong **God kata asinong iria tauan na aina,** ⁷**nang tukulai ina tauan ka papelek a tamana ve rinana na kame ago kuvul ve kana aina,** ⁸**na kilongla sikei palau a pukun.** Sukana vang, parik kilonglapa anguan pongua an, kilonglapo sikei. ⁹Asukang a sa na God kata la pala kuvul ia, ka ago ta mangsikei ka luang ia.” ¹⁰Au, nei lu na kana keve nat i akalit kianla susuai ania ta keve nem ang. ¹¹Na kala antok iria ta, “Man a mangsikei kata la kamus si kana aina na kanla osongon ta mang anu, sukana kapo abis a lau rikek taun ia. ¹²Na man a aina kata la kamus si kana tauan na kanla osongon ta mang anu, sukana kapo abis a lau rikek.”

Iesu kapo amatung kunga si ri nat kavulik lik

(Mt 19:13-15; Lk 18:15-17)

¹³Na kimela serei ve ri nat kavulik lik taun ia ani kame amatung kunga singiria, na kana keve nat i akalit kimela marala suak iria. ¹⁴Na Iesu kala arai ani oring ke, kala marala na kala antok iria ta, “Mi lomom suai ani ri nat lik ane singig. Ago ta atakun an aniria, using a matan vap

val ria, kakaria vang na sinsinongan si kana vainagoan a God. ¹⁵Napo mengen atutuman imi ta man a sikei parik kapa ainak val nat lik ani kana vainagoan a God, parik luai kapa palak.” ¹⁶Na kala vongok iria na ka amatung lakat a kungana si siksikei iria na kala poso atauia iria.

Igenen tauia

(Mt 19:16-30; Lk 18:18-30)

¹⁷Na kalapo tutapong pok kana paspasal, na mang igenen kala sang taun ia na kamela sovusulai singina na kala sui ia ta, “Katakai i akalit ro, sa naka vil ia ani kakag a to asikei?” ¹⁸Na Iesu kala antok ia ta, “Sa tukulai ina na kupo kin iau ta napo ro? Using God papalik nia kapo ro. ¹⁹Kupo malangas a keve asok tapai ang ta **Ku ago ta daung an, ku ago ta putuk osongon an, ku ago ta ainau an, ku ago ta posposo akapau an mete saupai,** ku ago ta kapau an asi luk palau ani bil si mangsikei, **ku mamaila aro ani tamam ve rinam.**” ²⁰Na kala antok ia ta, “Katakai i akalit, riria aongos nata using arukup iria le si taun natapo liklik lak tung kana.” ²¹Na Iesu kala arai velai vinga ro ania na kala antok ia ta, “Mangsikei a bil lak kupo inongos asi kam abis ania asukang ke. Ku pasal na ku an atos ta kam keve togtogon, na ku alis ani ri vap logo, ani kakam a togtogon roron metekuku. Na kume using iau.” ²²Taun kala longong a mengen ang na nono kala dai velai ni makus lava na kala pasal akipai, using kapo igenen duk ta togtogon.

²³Na Iesu kala taval taun kana keve nat i akalit na kala antok iria ta, “Vola kitmat luai ani igenen tauia si palak nei kana vainagoan a God.” ²⁴Na keve nat ang kila taping ani kana mengen. Sikei Iesu kala anguan mengen an ta, “Kag inatus, kapo kitmat luai asi palak nei kana vainagoan a God! ²⁵Palak ang si igenen tauia ane nei vainagoan ang si God, ka kitmat luai ani papalakan si kamel nei malang i sangum.” ²⁶Na kilapo taping alava luai, na kipo sui angpokpokai aniria ta, “Au, man kapo asukang, si ka angkoai si sapang?” ²⁷Na Iesu kala tun iria na kala antok ta, “Ani ri vap kapo kitmat, sikei ani God, kapo remrem, using keve bil aongos God kapo angkoai si vil ania.” ²⁸Na Petero kalapo mengen ia ta, “Arai, namemtala papelek a keve bil aongos asi kamem using anim.” ²⁹Na Iesu kala antok ta, “Napo antok atutuman imi ta man a si ka papelek kana rina, na keve tasina, tauna, rinana, tamana, kana inatus vo kana keve matang, si asan ig vo si asan i akus ro, ³⁰tutuman luai ka luk pok lak a tauia tavirimok luai i keve rina, tasina, tauna, rinana, kana inatus, na kana keve matang si to ke, na ka luk kapa na vilvil akui, na si to e mung ka teng a to asikei. ³¹Sikei vap miang kitapo aino, kime aimung, na riria kitapo aimung, ki an aino.”

Iesu kata vapotol i mengen ta ka mat na ka tadut pok

(Mt 20:17-19; Lk 18:31-34)

³²Na kilapo paspasal e selen alak ane Ierusalem, na Iesu kapo lili ainoai aniria, na kipo lomlomoni amiang, na vap po aimung ang kipo

leng. Na kala anguan songo an ani 12 na nat ane ngising na kala atatai iria ta keve nem ang ka serei lak singina. ³³“Arai, taralapo palak vang ane Ierusalem, na kian alis suai ani igenen i pukun taun a keve ainoinoi si ri katakai i sula na keve vap malangas ani saupai, na kian alis saupai ani kan mat, na ki lis ia e kungaria i ri vap i ngising, ³⁴na ki kurek ia, ki kanus ia, ki sasaup ia na kian raung punuk ia. Na e mung i potol a taun ka tadut pok.”

Sokotuk si ri Iakovo ve Ioanes

(Mt 20:20-28)

³⁵Na ri Iakovo ve Ioanes, ngono nat ang si Sebedaio, kilongmela antok ia ta, “Katakai i akalit, mang bil namemlongpo buk ua ta ku abis ia animemlong.” ³⁶Na kala sui irilong ta, “Saka nem an milongpo buk ia ani naka abis ia?” ³⁷Na kilongla antok ia ta, “Ku ainak animemlong ta mangsikei kan sinong si kam palso na mang anu si kam palkais nei kam miminaungan i sinsinongan.” ³⁸Na Iesu kala antok irilong ta, “Parik milongpa nas a sa milongpo aikut ia. Sa, milongpo angkoai si inum si kavi ke napo usausa asi kag inum singina? Sa, milongpo usausa si luk ani asing tauia ke napo usausa si luk ania?” ³⁹Na kilongla antok ia ta, “Namemlongpo angkoai.” Na Iesu kala antok irilong ta, “Kavi ke naka inum singina, milong inum kapa singina, na asing tauia ke naka luk ia, milong luk ia, ⁴⁰sikei si sinong si kag palso vo palkais, parik vang kapa kakag si kag posong singina. Ngono palpai ang kapo kakaria, riria kitala itoiton ia aniria.” ⁴¹Au, mang sangauli na nat ang kila longong a bil ke, na kilapo songag ani ri Iakovo ve Ioanes. ⁴²Na Iesu kala songo akuvul iria na kala antok iria ta, “Mipo nas a ri vap i ngising, kari keve vap vo sausaupai kipo aunai lakat aniria. Na kari keve vap asanan kipo aunai sausaupai aniria. ⁴³Sikei parik kapa ro ta ka asukang singimi. Sikei si man a si kapo buk ani ka laba singimi, kapo ro ani ka serei a asosokai singimi aongos. ⁴⁴Na si kapo buk tu ainoinoi animi ka auak ia ani ka asosokai e kevkev imi aongos. ⁴⁵Using a igenen i pukun kata serei parik asi kari me asosokai singina, sikei asi kana me asosokai singiria, na asi kana me mat bat ani vap miang na asukang ka samui apok iria.”

Iesu kata vil ato na Bartimaio

(Mt 20:29-34; Lk 18:35-43)

⁴⁶Na kianla serei e Ieriko. Na taun ang kalapo papelek a Ieriko ve kana keve nat i akalit kuvul ve mang petau lava, Bartimaio, tamana ta Timaio, mangsikei a igenen ba na katapo uli aikut papakangai, katapo sinong ngere selen. ⁴⁷Na kala longong ta Iesu le Nasaret, na kala songo alava ta, “Iesu, nat i David, ku ngorem iau!” ⁴⁸Na vap miang kilapo atakun ia ani ka ago ta mengen an. Sikei kala songosongo alava luai ta, “Nat i David,

ku ngorem iau!”⁴⁹ Na Iesu kamela tung na kala antok ta, “Mi songo ia.” Na kila songo na igenen mata ba ang, velai ani ki antok ia ta, “Ku uruk. Tapasuk, kapo songo nang ua.”⁵⁰ Na kala kiang suai ani kana vakup i po apupung, ka laos atung na kala pataun a Iesu.⁵¹ Na Iesu kala sui ia ta, “Kupo buk ani naka vil sa anim?” Na ba ang kala antok ia ta, “Raboni, napo buk asi kag mata arai.”⁵² Na Iesu kala antok ia ta, “Ku pasal. Kam lomlomon katala vil ato ua.” Akorong palau kala ararai aro na kala using ia e selen.

Iesu kata palak val tulava nei Ierusalem

(Mt 21:1-11; Lk 19:28-40; Io 12:12-19)

11 ¹Na kian lapo pasal angasungai i Ierusalem, asi an serei e Betpage na Betania, si mulang ang Elaio, na kala asok a pongua i kana keve nat i akalit ane no, ²velai ani mengen anirilong ta, “Milong pasal taun a rina suke e no, na man milonganla palak, milong sabonai ani dongki tanginang kita pala ia, na parik lak ta mang anu katapa kokos singina. Milong kunis ia na milong tak ia ane ke. ³Man a sikei ka sui imilong ta milongpo vil ia ani sa, milong antok ta Volava kapo inongos taun ia na ka alis suai sumasuma pok ania.” ⁴Au, kilongla pasal na kilonganla sabonai ani dongki tanginang ang ngere selen kita pala akit ia si takaman i mang lu. Na kilongla luang ia ⁵na vap po tung asung ang kila sui irilong ta, “Au, sa na milongpo luang suai ani dongki tanginang ang?” ⁶Na kilongla ngenget val kana atatai a Iesu, na kila ainak anirilong. ⁷Na kilongla tak a dongki tanginang ke taun a Iesu na kilong amatung lakat karilong keve vakup i po apupung kuluna na kala gon lakat kuluna. ⁸Na vap duk kila kun veleveles ani kari keve vakup i po apupung e nei selen na mang matan kipo veleveles pan i ei le nei uten. ⁹Na vap po aino ang kuvul ve ria e mung kipo songosongo asukang ke, **“Alatun! Atautauia ane si vopo serei ke ta asan i Volava.** ¹⁰Atautauia ane si vainagoan vopo serei ke si tivura David. **Alatun** ane pangkul luai!” ¹¹Na kala serei e Ierusalem na kanla palak nei rina i atailai. Na taun ang kala ararai aongos e iang, using kalapo ngelik, kala soung suai pok ane Betania ve kana sangauli na pongua na nat i akalit.

Iesu kata amese na iei

(Mt 21:18-19)

¹²Si taun using ina, kilapo papok le Betania na kalapo buk angan, ¹³na kala arai ani mangsikei a suke kapo tung avunga na kapo urung. Na kala pasal taun ia asi kana an ngumut ta ring uai, sikei kanla arai ta kapo kovek, kapo papanan palau, using parik lak kapa inuai. ¹⁴Na kala antok ia ta, “Le kana na asikei ka kovek ta sikei ka angan a uaim!” Na kana keve nat i akalit kipo longong ia.

Iesu kata vil adaus na rina i atailai
(*Mt 21:12-17; Lk 19:45-48; Io 2:13-22*)

¹⁵Na kianla serei e Ierusalem, na kala palak nei rina i atailai na kanlapo lu asoung a vap po samui na asesel ang nei rina i atailai. Ka ul aturung a keve pata singiria kipo sakol kapkap, na keve sinsinongan singiria kipo atos ta ri uk. ¹⁶Na ka atakun iria ani ki ago ta asalak an ani kari usausan alak ane nei rina i atailai. ¹⁷Na kala vil akalit aniria velai ani mengen ta, “Sa, parik kitapa salik ia ta, **Kag lu kapo lu si sokotuk ta mamain ta matan vap aongos?** Sikei kana milapo pokai ania asi kana bil val wakil si ri vap tainau.” ¹⁸Na keve ainoinoi si ri katakai i sula kuvul ve ri vap malangas ani saupai kila longong a nem ke na kila gule selen ani ki raung suai ania, using kipo leng ania using vap duk kipo mangal kana akalkalit. ¹⁹Au, tenei ngelik vong kila soung pelek a rina.

Luk malangas le siiei mak
(*Mt 21:20-22*)

²⁰Na taun kilapo paliu vauk e selen, na kila arai ani ei ang kala mak aongos tung si mis ina. ²¹Na Petero kala lomlomonai pok na kala antok ia ta, “Katakai i akalit, ku arai ani ei suke kuta varas ia, kala mak aongos.” ²²Na Iesu kala polpol ta, “Mi lomlomon ta God. ²³Napo antok atutuman imi ta man a si ka asok a mulang ke ta, ‘Ku tapasuk na kuan asuai anim nei laman!’ na parik kapa sugul e lomlomonai ina, sikei kapo lomlomon ta sa katala kin ia ka serei, ka asukang palau. ²⁴Asukang a napo antok imi ta man mi sokotuk a mangsikei a nem na mipo lomlomon akit ta mi atogon ia asukang, tutuman, mi luk ia. ²⁵⁻²⁶Man mipo tung asi sokotuk, mi lomlon suai ani lau rikek si mang sikei, ani tamami e metekuku ka kun lomlon suai ani kami keve lau rikek.”

Kipo sui a Iesu ta kana ro asi abis
(*Mt 21:23-27; Lk 20:1-8*)

²⁷Na kianla serei pok e Ierusalem, na kanlapo pasal nei rina i atailai na keve ainoinoi si ri katakai i sula, na vap malangas ani saupai kuvul ve ri vap lava kimela serei singina, ²⁸na kila sui ia ta, “Si saka ro an kana kupo abis a keve abis ke? Si kata alis ua ta ro asi abis ania?” ²⁹Na Iesu kala antok iria ta, “Naka sui imi ta mang susui, na man mila polpol aro ia, nau naka antok imi ta kag saka ro an asi abis ani keve abis ke. ³⁰Ioanes si kana asing tauia, kata luk a ro ang le metekuku vo le si ri vap? Mi ngenget iau.” ³¹Na kilapo anggegelai ta, “Man tara antok ta le metekuku, kala sui ira ta sa tukulai ina parik taratapa lomlomon tatana. ³²Sikei, parik kapa kun ro si antok ta le si ri vap.” Kipo leng ani ri vap using ri vap aongos kipo lomlon ia ta Ioanes katapo katakai i kus

amalangas tutuman. ³³Asukang na kila polpol a Iesu ta, “Parik namempanas.” Na Iesu kala antok iria ta, “Nau kapa, parik napa kun antok animi ta saka ro an kana napo abis a keve abis ke tatana.”

Kankanuai i mengen ani vap rikek aiveven matang

(Mt 21:33-46; Lk 20:9-19)

12 ¹Na kala mengen singiria si kankanuai i mengen asukang ke, “Mangsikei a igenen kata sukal kana matang vaen na kala omo aulitai ania na kala atu ring asi kokomeng ani uai, na kala abis a lu lakat ipo ararai bat, na kala alis tapai ani matang ke si mang keve vap aiveven matang, na kala pasal akipai ane si mang rina. ²Na si taun i kokpokus kala asok a mang asosokai taun a vap po aiveven matang ang ani kanluk ta palpal uai i kana matang. ³Na kianla teng akit ia, ki vis arikek ia na kila asok suai palau pok ania. ⁴Na kala anguan asok pok an ani kana mang asosokai na kianla tangai ia e vangang ina na ki vil amese ia. ⁵Na kala asok a mangsikei na kianla ngapunuk ia. Na ninia palau a lau ang kita vil ia si mang keve asosokai duk ang asukang palau. Kita vis a mang matan na ki raung a mang matan. ⁶Au, kapo atogon a sikei a nat aoleman, kana nat akorong, na e mung luai kala asok ia taun a vap ang nei matang using kapo lomona ta, ‘Ki mamaila ani kag nat.’ ⁷Sikei, vap aiveven matang ang kila angtokai ta, ‘Arai ta votauk i togtogon iles. Akos, tara me vil punuk ia ani kakara na togtogon ang.’ ⁸Au kila teng akit ia, ki ngapunuk ia na ki asuai akipai ania pelek a matang ang. ⁹Au vo tauk i matang ang ka abis sa? Ka serei na ka vil punuk suai luai ani keve vap po aiveven matang ang na ka alis a matang ang si mang vap petekai. ¹⁰Sa, parik kana mitapa tataot a vuk mengen ke nei salsalik? **Iat ke ri katakai i abis lu kita kilis ia, kana kala serei a iat talupus luai.** ¹¹Bil ke, **Volava kata asereiai ania, vola miminaungan luai e matara.**”

¹²Na kilapo buk teng akit ania using kilapo nas ta kapo mengen atokngai nang aniria. Sikei kipo leng ani vap po duk ang, na kila atolongon ia na kila pasal suai.

Samui takis ane si Kaisar

(Mt 22:15-22; Lk 20:20-26)

¹³Na kila asok a mang matan Parisaio kuvul ve mang matan i petau ang si Erodes asi kari an teng akit ania si kana mengen. ¹⁴Na kianla serei singina na kila antok ia ta, “Katakai i akalit, namempo malangas ta kupo igenen atutuman na parik kupa tarakai ani mangsikei using ri vap kipo angkokoai palau e matam. Na kupo akalit atutuman ta selen si God. Sa, kapo korong ani tara samui takis ane si Kaisar, vo parik? ¹⁵Tara samui ia vo tara ago?” Na lenginang kala nas kari kapau na kala antok iria ta,

“Marai sa mipo buk atokngai anig? Me ta ring kapkap ane ke. Name arai.” ¹⁶Na kila luk dong ia, na kala sui iria ta, “Au, nona i si kana? Na asan i si kana?” Na kila antok ia ta, “Ke Kaisar.” ¹⁷Au na Iesu kala antok iria ta, “Mi alis a Kaisar ta sa ke Kaisar, na mi alis a God ta sa ke God.” Na kila sugul alava ia.

Susui i tadut pok

(Mt 22:23-33; Lk 20:27-40)

¹⁸Na ri Sadukaio kimela serei singina, kipo agel suai ani tadut pok, na kila sui ia ta, ¹⁹“Katakai i akalit, Moses kata salik ia anira ta **man a igenen ka mat** pelek kana aina **kovek i inatus, tasina ka osongon pok ia asi kana aumata nat ani tasina.** ²⁰Katapo atogon a limalengua na angtasimal, anu tuan kata osongon kana aina na kala mat pelek ia kovek i nat. ²¹Asukang si anu tasin kala kun osongon ania na kala kun mat kovek i nat, na asukang si vapotol ina. ²²Na limalengua na angtasimal ang kita kovek i nat. Na e mung luai aina ang kala kun mat kapa. ²³Si taun i tadut pok, ke si iria ta aina ke? Using a limalengua na angtasimal kita osongon tatana.” ²⁴Na Iesu kala antok iria ta, “Arai, mipo lok singina using parik mipa nas a mengen i nei salsalik na parik kapa mipa malangas kana kitmat a God. ²⁵Using si to e mung ri vap parik kipa angosongon, parik. Kian bil val ri angelo metekuku. ²⁶Au, na ani tadut pok si ri vap mat, vei parik lak nganing mipa taot nei buk si Moses ani ei ang katapo ni? God kata antok ia ta, **Nau a God si Abaram, God si Isak, na God si Iakov.** ²⁷Parik kapa God si ri vap mat, sikei singiria kipo to. Kami lomlomonai kapo lok luai.”

Saka asok tapai an kapo lavlabat?

(Mt 22:34-40; Lk 10:25-28)

²⁸Na mangsikei i vap po malangas ani saupai kamela serei. Katapo longong iria si po anggegelay, na kala arai ta kata lapo polpol aro luai aniria, asukang a kamela sui ia ta, “Si i keve asok tapai kapo mamaiten lava?” ²⁹Na Iesu kala ngenget ta, “Ainoai ina ta, **Mi longong, ri Israel! Volava kara God kapo sikei palau. Kapo kovek ta mang Volava.** ³⁰**Ku atogon aongos a Volava kam God, ta vingam aongos, na malanganto im aongos,** na lomlomon im aongos, **na kitmat im aongos.** ³¹Na vapongua asukang ke, **Ku vinga ro taun a tungam val kupo vinga ro taun pok ua.** Kapo kovek ta mang asok tapai kapo mamaiten ani pongua ke.” ³²Na igenen malangas ani saupai ang kala antok ia ta, “Kala ro luai, katakai i akalit, kutala polpol aro ta **kapo sikei palau, na kapo kovek ta mang sikei,** ³³na asi kara atogon ania ta **vingara aongos na lomlomon ira aongos na kitmat ira aongos,** na asi kara vinga ro taun **ani tungara val tarapo vinga ro taun pok ira.** Na kapo mamaiten

luai asi longong ani ngono asok tapai ke ani tara alis a God ta alilis kita sula ia na mang matan alilis kapa.” ³⁴Na Iesu kala arai ta kapo polpol velai ani masam, na kala antok ia ta, “Parik kupa ago avunga ani kana vainagoan a God.” Na le si vuk pangau ke riria aongos kilapo lolokovo luai ani sui ania ta mangsikei a susui.

Igenen i akanangai, tamana ta si?

(Mt 22:41-46; Lk 20:41-44)

³⁵Na Iesu katapo vil akalit nei rina i atailai na kalapo mengen asukang ke, “Kapo saka bil an na ri vap malangas ani saupai kipo mengen ta igenen i akanangai kapo nat i David? ³⁶David akorong si Malanganto Gogoai kata posong ta, **Volava kata antok kag Volava ta ku sinong si palso ig, tung si naka vil a vap po petau ang anim asi kari ago neite ngono kakim.** ³⁷David akorong kapo kin ia ta Volava. Asukang a kapo saka angkoai an si kin ania ta kapo nat ina?” Na petau lava ang kitapo longong ia, vap la uruk ani kana mengen.

Iesu kapo porot ri vap malangas ani saupai marai kari lok

(Mt 23:1-36; Lk 20:45-47)

³⁸Na si kana akalkalit katapo mengen iria asukang ke ta, “Mi aiveven si ri vap malangas ani saupai. Kipo buk pasal pulakai ta maus roron na kipo buk ri vap ki posong aro singiria nei keve ring i atos, ³⁹na kipo pigpig ta keve sinsinongan lava nei lu i kivung na keve oring mamaila si keve matan angan. ⁴⁰Kipo tainau kari keve lu ri mainang, na kipo kapau ta posong ani keve sokotuk vungavunga. Kari amiming ka tavirimok luai.”

Alilis si mainang

(Lk 21:1-4)

⁴¹Na kapo sinong asung i asisiang ipo asia alilis na kapo tun ri vap si po asiang kapkap. Vap tauia duk kimepo kun asiang ani kari keve alilis lava. ⁴²Na mangsikei a mainang logo kamela asiang kana pongua na vuk kapkap lik luai. ⁴³Au, kala songo akuvul kana keve nat i akalit na kala antok iria ta, “Napo mengen atutuman imi ta mainang logo ke katala asiang alava luai ani vap aongos ke kipo asiang kari keve kapkap, ⁴⁴using riria kitala luk tapong le si kari togtogon i kari tauia na kila alis, sikei ninia, le si kana logo luai, katala alis asip ta sa katapo angkoai si kana to aongos.”

Rina i atailai kime galang ia

(Mt 24:1-2; Lk 21:5-6)

13 ¹Na si taun kalapo soung pelek a nei rina i atailai mang sikei i kana keve nat i akalit kala antok ia ta, “Katakai i akalit, ku arai

ani keve at lava si keve lu roron suke.”² Na Iesu kala antok ia ta, “Kupo arai ani keve lu lava ke? Ka serei lak a taun na ka kovek luai i ngoto roron. Kime gelang aongos ia.”

Tutapongai i mamaiten

(Mt 24:3-14; Lk 21:7-19)

³Na kanlapo ago kuli mulang ang Elaio, ararai aputuk taun ani rina i atailai. Na Petero, Iakovo, Ioanes na Andereas, ria papalik ve nia, na kila sokotuk ia ta, ⁴“Ku antok imem, angisan a keve bil ke ki serei? Na saka akanangai an i taun i kari serei atutuman?”⁵ Na Iesu kalapo atatai iria asukang ke, “Mi aiveven, vei mangsikei nganing ka kapau imi. ⁶Vap miang ki serei na ki posong pok iria ta asan ig na ki antok ta ‘Nau kana ninia,’ na ki kapau a vap duk. ⁷Na man mi longong ta kalapo atogon visvis vo kalapo angasungai a visvis, mi ago ta leng an using a keve bil ke ki serei, sikei akamusai ina lak, parik. ⁸Using mang palpal vap ka tapasuk na ka angvis ve mang palpal vap, na mang vainagoan ka angvis ve mang vainagoan. Na mimo ka serei si mang keve rina, na ka atogon a keve buk angan lava. Keve nem ke kapo tutapongai palau i kui. ⁹Mi aiveven aro imi, using ki teng akit imi lak taun a saupai. Ki ngamis imi e nei keve lu i kivung. Mian tung mete ri ainoinoai na ri tulava marai ig, asi kami akusku atutuman e mataria. ¹⁰Na akus ro, mamain ta patvap aongos ki luk aino ia. ¹¹Man ki teng akit imi, na ki alis suai animi taun a saupai, mi ago ta urui an ta mi an saka mengen an, sikei mian mengen ta mengen ang mi luk ia si vuk taun ang. Using parik ta nami mianpa mengen, Malanganto Gogoai ka mengen. ¹²Igenen ka alis suai ani tasina asi an raung ania. Inatus kapa ki puka si tamaria si lau ke. Na ri tamaria ve rinaria kapa, ki kun mat si kari inatus. ¹³Na ri vap aongos ki mirik animi marai asan ig, sikei man a si ka tung akit tung si akamusai ina, ka sapang.

Taun rikek luai

(Mt 24:15-28; Lk 21:20-24)

¹⁴Taun mi arai ani bil vopo nau varas ani God na kapo goeng rina, ki atung ia si ring ang kapo atogon tubat singina, vopo taot a mengen ke, ka lomlomonai aro ania, si taun ang ria kipo ago e Iudaia kapo ro ki sip taun a keve mulang. ¹⁵Ninia kapo ago e komo i lu, ka ago ta riuk lak pok an taun ani kana togtogon. ¹⁶Na ninia kapo ago e matang kapo ro ka ago ta papok an ane rina si an luk ani kana vakup. ¹⁷Pua ta ri aina vinga na riria kipo atutus popo si taun ang! ¹⁸Mi sokotuk ani nem rikek ang ka ago ta serei an si taun livus. ¹⁹Using si taun ang ka atogon a mamaiten tavirimok, na kapo laba ani keve mamaiten le si tutapong i kuli rina ke God kata asinong ia, tung si taun ke na aimung kapa. ²⁰Na man a Volava

parik kapa vil akudik a taun ang, ka kovek luai ta sikei e kuli rina ka sapang. Sikei using kana vap i la songo, asukang a ka vil akudik ia. ²¹Si taun ang man a mangsikei ka antok imi ta, 'Mi arai, igenen i akanangai kana!' vo 'Nia sukana ia!' mi ago ta lomlomon an tatana, ²²using a mang matan igenen i akanangai na katakai i kus amalangas kapau ki me serei. Ki me serei na ki vil a keve akanangai na keve bil i vilvil ataping asi kari me atokngai asi ausingai alok ani kana vap i songo na God. ²³Mi aiveven! Natala atai usausa imi aino ta saka keve bil an ki serei lak.

Serei pok si igenen i pukun
(Mt 24:29-31; Lk 21:25-28)

²⁴Sikei si taun ang, e mung i mamaiten lava ang, makarap ka vong gup, na ulen parik kapa anguan mang an, ²⁵na ri kalto ki uak asiang le metekuku, na keve kitmat e metekuku ki mimo. ²⁶Na si taun ang ki arai ani **igenen i pukun ka serei kuli kuku** ta kitmat lava na miminaungan. ²⁷Na ka asok kana mamain ta angelo ani kian songo akuvul aongos kana vap i la songo, riria kipo ago si keve palpal aongos i kuli rina na metekuku.

Luk malangas le si iei
(Mt 24:32-35; Lk 21:29-33)

²⁸Mi luk malangas si laulauan i ri suke. Man kala urung atangingang, mila kinle ta taun sinang roron kalapo angasungai. ²⁹Na asukang kapa, man mila arai ani keve nem ke kala serei, mila malangas ta kalapo angasungai luai e mete takaman palau ani ka serei. ³⁰Napo antok atutuman imi, kana na matan polpolokan i taun ke parik kipa mat suai aino ani keve bil ke kila serei. ³¹Metekuku na kuli rina ka tamus suai, sikei kag mengen parik kapa angkoai luai si tamus.

Kapo kovek i si kapo nas a taun
(Mt 24:36-44)

³²Pangau i taun vo vuk taun ina, kapo kovek i mangsikei kapo nas ia. Ri angelo i metekuku na kana nat parik kipa nas, sikei tamana papalik kapo nas. ³³Mi aiveven na mi usausa, using parik mipa malangas ta angisan na taun ang ka serei. ³⁴Kapo asukang val igenen kata usausa asi kana pasal ane ring vunga. Taun ang kalapo buk pasal pelek ani kana rina, kala asok kana keve asosokai ani ki aiveven kana keve bil na kala lis iria siksikei ta kana keve abis, na kala asok a katakai i aiveven takaman asi kana ararai bat. ³⁵Asukang a mi aiveven, using parik mipa nas ta saka taun an na vo tauk i lu kame serei pok singina, si ngelik sagup, vo si liuan i vong, vo si no i tangat lik, vo si makarap kalapo sanglak. ³⁶Vei nganing kame serei ataping na kala arai ta mipo rodot. ³⁷Sa kana napo mengen imi tatana, animi aongos ta mi aiveven!"

Lilimukai si vil punuk ani Iesu
(Mt 26:1-5; Lk 22:1-2; Io 11:45-53)

14 ¹Au, kalapo pongua na taun lak e no ani Liuluai, nang a matan angan i saui i tav tol. Na keve ainoinoi si ri katakai i sula ve ri vap malangas ani saupai kime lapo gule selen asi kong mumun ania na ki vil punuk ia. ²Using kitapo antok ta si taun i matan angan ka ago vei nginging ri vap ki visvis.

Aina kata amaus a pukun i Iesu
(Mt 26:6-13; Io 12:1-8)

³Si taun ang kalapo ago e Betania nei lu si Simon vo tapak ke, na katapo angan, na mangsikei a aina kamela serei, na katapo teng a ese laman sain roron luai na kapo samui lava luai kapa. Na kala putuk a ese ang na kala tiuai ani rul sain ro ang e patuna. ⁴Na mang matan vap e iang kilapo songag na kipo angsusui ai asukang ke ta, “Sa tukulai ina na kipo amun palau a rul sain roron ke? ⁵Using man kita atos tatana, oro kila luk a 300 na kang alak na ki alis ri vap logo tatana.” Na kila ki ia. ⁶Sikei Iesu kala antok iria ta, “Atalipai ania! Marai sa mipo mengen arikek ania? Kana kapo abis a mangsikei a bil roron luai anig. ⁷Arai, mi uli ago lak ve ri vap logo, na mipo uli atogon taun asi pakangai aniria. Sikei nau parik napa uli ago ve nami. ⁸Katala abis a sa kapo angkoai singina. Katala tiu a pukun ig ta rul sain ro usausa iau ani mo. ⁹Napo antok atutuman imi ta si saka ring an kuli rina ki akusku ta akus ro, akusku kapa i sa na aina ke kata abis ia ki kun akusku kapa tatana asi rungrungai ania.”

Iudas kata ainak ani ka alis suai ani Iesu
(Mt 26:14-16; Lk 22:3-6)

¹⁰Na si taun ang Iudas Iskariot, sikei iria i 12 na nat i akalit, kanla serei si keve ainoinoi si ri katakai i sula, using kapo buk alis suai ania e kungaria. ¹¹Na vap la uruk si po longong ani mengen ang, na kila palapalatung ve nia ta ki samui ia. Na kalapo gusgus ta saka pangau an kapo kalakala si alis suai ania e kungaria.

Angan i Liuluai ve kana keve nat i akalit
(Mt 26:17-25; Lk 22:7-14,21-23; Io 13:21-30)

¹²Si ainoai i taun i saui i tav tol, taun ang kipo raung a natnat i sipsip singina, kana keve nat i akalit kila sui ia ta, “Nei a ring ang kupo buk ani namem an itoiton anim singina si angan ani Liuluai?” ¹³Na kala asok a pongua i kana keve nat i akalit na kala atatai irilong ta, “Milong pasal ane nei rina na e iang mang igenen kapo sunguk kana ese laman ka duai imilong. Milong using

ia ¹⁴taun a lu ang kan palak singina na milong mengen a vo tauk i lu ang ta, 'Katakai i akalit kapo sui ta nei kag palpal i lu ani ri sokoung, ani namem ve kag keve nat i akalit namem me angan a Liuluai singina?' ¹⁵Ka akalit imilong ta palpal lava e pangkul kitala itoiton ia na kalapo usausa asi ago. Na e iang milongla usausa anira singina." ¹⁶Na ngono nat ang kilongla pasal ane nei rina na kilonganla sabonai ani keve nem ang val kata mengen irilong tatana. Na kilonganla itoiton a Liuluai. ¹⁷Na si tenei ngelik i taun ang kamela serei kuvul ve 12 na nat i akalit. ¹⁸Si pangau ang kipo sinong angan singina, Iesu kala antok iria ta, "Napo mengen atutuman imi ta sikei imi ka alis suai anig. Mangsikei imi mipo angan ve nau." ¹⁹Na kilapo makus na siksikei iria kalapo sui ia ta, "Vei nau nganing?" ²⁰Na kala antok iria ta, "Kapo mangsikei i 12 na nat, voiang namemlongpo abui saui kuvul nei gapai ke. ²¹Using a igenen i pukun ka mat val kitala salik aino tatana, sikei ka rikek luai ani vo alis suai ang ani igenen i pukun. Pat ka ro ania man parik kitapa ingus ia!"

Matan angan si Volava

(Mt 26:26-30; Lk 22:15-20; 1 Ko 11:23-25)

²²Si pangau ang kipo angan lak singina, na kala luk a saui, na kala posong ro singina, na kala tevek ia na kala lilis aliu iria na kala antok ta, "Mi luk ia. Kana na pukun ig." ²³Na kala luk a kavi, kala posong aro, na kala alis iria, na riria aongos kila inum angsialai singina. ²⁴Na kala antok iria ta, "Kana na rangaig ani angainakai, na ka saling ani vap miang." ²⁵Napo antok atutuman imi ta parik napa anguan inum an si laman i vaen tung si nakan inum ia si selen tanginang si kana vainagoan a God. ²⁶Au na kila tangam kari sikei a tangam na kila soung taun a mulang ang Elaio.

Petero ka agel suai ani Iesu

(Mt 26:31-35; Lk 22:31-34; Io 13:36-38)

²⁷Na Iesu kala antok iria ta, "Nami aongos lak mi savang, using kitala salik ia ta, **Na nga punuk na katakai i aiveven sipsip na keve sipsip ki tamale angtaliungai.** ²⁸Sikei, e mung i kag la tadut pok le, naka aino imi ane Galilaia." ²⁹Na Petero kala antok ia ta, "Man riria aongos kila savang, nau parik." ³⁰Na Iesu kala antok ia ta, "Napo mengen atutuman ua ta aino le ani pura ka apongua i tirtiriku nganlak, kula amatan potol a agel suai anig." ³¹Na kala mengen akitmat luai ta, "Kantanem si man nakan mat ve numai, sikei parik luai napa angkoai si agel suai anim." Na ria aongos kila kun antok asukang.

Sokotuk e Getsemani

(Mt 26:36-46; Lk 22:39-46)

³²Na kianla serei si ring ang kipo kin ia ta Getsemani na kala antok kana keve nat i akalit ta, "Mi ago e ke, na nau nakan sokotuk." ³³Na kala songo na Petero

na Iakovo na Ioanes asi auai ve nia. Na si taun ang kala pat ia na mamaiten lava. ³⁴Na kala antok iritol ta, “Makus lava ke kalapo rongos iau angasungai ani naka mat. Mitol ago e ke na mitol para.” ³⁵Au, kala pasal avunga lik na kanla suai ania e vunep na kala sokotuk ta man kapo angkoai, kui rikek luai ke ka liu luai ania. ³⁶Na kala antok, “Aba, mamai, keve nem aongos kapo angkokoai singim. Ku luk suai ani kavi ke pelek iau. Lak, vubuk ke singig ka ago, sikei ku using kam vubuk.” ³⁷Na kanla serei pok singiritol, na kitolapo rot. Na kala antok a Petero ta, “Simon, kulapo rot? Sa, parik kupa angkoai si aiveven ani vuk taun kudik lik? ³⁸Mitol aiveven na sokotuk, vei atoktokngai ka luk imitol. Malanganto kapo naung, sikei pukun kapo ngau.” ³⁹Na kala anguan pasal asi kana an sokotuk na kanla kin pok a mengen ang kata kin aino ia. ⁴⁰Taun kamela serei pok kamela arai ta kitolapo rot punuk, using a mataritol katapo maiten luai. Na parik kitolpa anguan malangas an ta kitol antok ia ta sa. ⁴¹Na kamela vapotol i serei pok na kala antok iritol, “Au sa, mipo rot lak, na mipo ausai lak? Kala angkoai. Taun kana kala serei ani ki alis suai ani igenen i pukun e kungaria i ri vap bil arikek. ⁴²Mitol tadut na tara pasal. Arai ani iuang kana kalapo serei asi kana me alis suai anig.”

Alis suai na teng akit ani Iesu

(Mt 26:47-56; Lk 22:47-53; Io 18:3-12)

⁴³Na akorong palau, si taun ang kapo mengen lak, Iudas kala serei, mangsikei i 12 na nat ang, na petau lava kipo aimung ina na kipo teng ri samele na ri avam, i la asok tapai ta keve ainoinoai si ri katakai i sula ve ri vap malangas ani saupai na ri vap lava i rina. ⁴⁴Vo alis suai ania katala antok amalangas lenginang iria ta mang akanangai asukang ke, “Si man na lulus a si, ninia palau a igenen ang, mi teng akit ia, na mi tak akipai ania na kan ago si aiveven kitmat.” ⁴⁵Au, kala serei na kala paliu akorong taun ia na kanla antok, “Rabi!” velai ani kala lulus ia. ⁴⁶Na kila teng akit ia. ⁴⁷Na mangsikei katapo tung asung e iang kala dal kana samele na kala tanga suai luai ani talingana i asosokai si ainoai i katakai i sula. ⁴⁸Na Iesu kala antok iria ta, “Au si napo katakai i tainau na mipo ruduai iau ta samele na avam? ⁴⁹Keve taun natapo vil akalit e matami nei rina i atailai na parik mitapa teng akit iau. Sikei, kapo serei asi atutuman ani mengen i nei salsalik.” ⁵⁰Na riria aongos kila papelek ia na kila sip suai.

Igenen tanginang kata sip

⁵¹Mang sikei a igenen tanginang kata using ia, kapo kavat palau ta sikei a vuk vakup, na kila kun teng akit ania. ⁵²Sikei kala sip taliung kana vakup ta pukun varas palau.

Iesu mete saupai

(Mt 26:57-68; Lk 22:54-55,63-71; Io 18:13-14,19-24)

⁵³Na kila tak a Iesu ane si ainoai i katakai i sula. Keve ainoinoai si ri katakai i sula kuvul ve ri vap lava na keve vap malangas ani saupai

kitapo ago kuvul e iang. ⁵⁴Na Petero katapo using avunga na kala palak nei omo i lu si ainoai i katakai i sula. Na kanlapo sinong maringin mete kut kuvul ve vap po ararai bat ang. ⁵⁵Au, keve ainoinoai si ri katakai i sula ve kuvkuvulan lava i po vil saupai kitapo gule vap asi mengen angkoai asi kari saupai ani Iesu singina using kitapo buk raung ania. Sikei parik kipa sabonai ta akusku tutuman. ⁵⁶Using vap miang kitapo kapau na kari keve akusku parik katapa angkuvulai. ⁵⁷Na mang matan vap kila tadut na kila poso mengen kapau ania asukang ke, ⁵⁸“Namemta longong ia, katapo mengen asukang ke ta, ‘Naka goeng na rina i atailai ke ri vap kita atung ia, na e mung i potol a taun, naka atung pok a mang sikei nang parik kipa abis ia ta kunga.” ⁵⁹Na vap ke kapa, si kari keve akusku, kapo tav angkuvulai. ⁶⁰Au, ainoai i katakai i sula kala tapasuk e mataria aongos na kala sui a Iesu ta, “Au sa parik kupa ngenget a mengen suke? Au sa sukana si atugtugi suke kipo mengen anim tatana?” ⁶¹Sikei kapo tung musik palau, parik kapa posong ta vuk mengen. Na ainoai i katakai i sula kala anguan sui an ania ta, “Numai a igenen i akanangai, nat i vopo ro luai ang?” ⁶²Na Iesu kala antok ta, “Io, nau palau. Na **mi arai lak ani igenen i pukun kan sinong e palso i vo kitmat na kapasiang kuli kuku le pangkul.**” ⁶³Na ainoai i katakai i sula kala ding pok kana maus na kala antok ta, “Kalapo kovek i mang mengen tarapo inongos taun ia. ⁶⁴Mitala longong kana mengen i nau varas. Nei kami lomlomonai?” Na ria aongos kila saupai ainak ta kalapo ago asi vil punuk ania. ⁶⁵Na mang matan iria kipo kanus ia. Ki volo bat a matana na kipo nak ia na kipo asok ia ta, “Ku kin vang.” Na ri vap po ararai bat ang kila tak le ia na kianla bis ia.

Petero kata agel suai ani Iesu

(Mt 26:69-75; Lk 22:56-62; Io 18:15-18,25-27)

⁶⁶Petero katapo ago lak e kevkev i nei omo ang, na sikei i keve kavulik asosokai si ainoai i katakai i sula kamela pasal asung. ⁶⁷Taun ang kala arai ani Petero si po maringin na kala pal akit ia, na kala antok, “Numai kapa nang, kutapo auai ve Iesu le Nasaret.” ⁶⁸Sikei kala gel suai ania ta, “Parik napa nas, na parik napa malangas a sa kupo mengen tatana.” Na kala soung suai ane komo. Na si taun ang akorong pura kala tirtiriku. ⁶⁹Na kavulik ang kala arai ania e iang na kala anguan atatai pok an ani vap po tung angasungai ang ta, “Igenen ke kapo mang sikei iria!” ⁷⁰Sikei kala anguan gel pok an. Na e mung lik palau vap po tung angasungai ang kila antok a Petero ta, “Tutuman luai, kupo mangsikei iria, using kupo igenen i Galilaia.” ⁷¹Na kalapo mengen amadot ta man kapo kapau, kapo ro ka mat na kala atuvala ta, “Parik napa nas a igenen ke mipo mengen tatana.” ⁷²Akorong palau na pura kala apongua i tirtiriku, na Petero kala lomlomonai pok ani mengen ang Iesu kata antok ia tatana ta, “Aino le ani

pura ka apongua i tirtiriku, kula amatan potol a agel suai anig.” Na kala tameng a vingana na kala tangis alava.

Iesu mete Pilato

(Mt 27:1-2,11-14; Lk 23:1-5; Io 18:28-38)

15 ¹Si tenei vauk lik keve ainoinoi si ri katakai i sula na ri vap lava na ri vap malangas ani saupai na aongos nei kuvkuvulan ang kila lomlomonai kuvul, na kila got a Iesu na kila takai ania asi an alis suai ania e kungana i Pilato. ²Na Pilato kanla sui ia ta, “Au, numai a tulava si ri Iudaia?” Na kala polpol ia ta, “Numai kupo kin ia.” ³Na keve ainoinoi si ri katakai i sula kila porot akit ia ta keve bil miang. ⁴Na Pilato kala anguan sui an ania ta, “Au sa, parik kupa buk polpol? Arai, kipo tupang ua ta keve bil miang.” ⁵Sikei Iesu kapo tav posong ta ring vuk mengeng lik, na Pilato kalapo sugul ia.

Asok si vil punuk ani Iesu

(Mt 27:15-26; Lk 23:13-25; Io 18:39–19:16)

⁶Si taun i matan angan i Liuluai katapo uli akala suai ani saka igenen an ri vap kipo posong ia. ⁷Na nei liuan i vap ang kipo ago nei akangbat, using kitapo daung nei visvis misagai, katapo atogon a igenen, kana asan ta Barabas. ⁸Na ri vap kimela serei na kilapo sokotuk a Pilato ta ka abis aniria val kana lau. ⁹Na kala sui iria ta, “Au, mipo buk iau asi kag akala dong animi ta tulava ke si ri Iudaia?” ¹⁰Using katapo malangas ta keve ainoinoi si ri katakai i sula kita alis suai ania using kitapo vinga rikek. ¹¹Sikei keve ainoinoi si ri katakai i sula kila asum a petau ang asi kari posong ta Barabas ka kala. ¹²Na Pilato kala anguan sui an aniria ta, “Au, saka nem an mipo buk iau asi kag vil ania si igenen ke mipo posong ia ta tulava si ri Iudaia?” ¹³Na kila songosongo alava pok ta, “Atakuk ia kuli ngakputuk!” ¹⁴Na Pilato kala antok iria ta, “Marai sa? Saka rikek an akorong kata abis ia?” Na kila songosongo alava luai ta, “Atakuk ia kuli ngakputuk!” ¹⁵Na Pilato, using katapo buk auruk ani petau ang, kala akala na Barabas dong iria. Na kala asok si sasaup ani Iesu, na kala alis suai ania asi kari an atakuk ania kuli ngakputuk.

Ri katakai i visvis kita kurek a Iesu

(Mt 27:7-31; Io 19:2-3)

¹⁶Au na ri katakai i visvis kila tak alak ia ane nei lu si tulava, nang a nan komo lava, le na kila songo akuvul alak aongos a petau lava iria. ¹⁷Na ki luk a vakup miminaungan na ki alak ia tatana, na kila abis a kuku ta angus sisilo na kila agon ia e patuna. ¹⁸Le na kipo atung alakat kunga ania. Na kipo kurek ia asukang ke ta, “Pua kala ro luai, tulava si ri Iudaia!” ¹⁹Na ki ngamis ia e patuna ta ue, kipo kanus ia, na kipo

sovusulai singina. ²⁰Si taun kila kamus ta kurek ania kila luang suai pok ani vakup miminaungan ang na kila alak akorong pok ia ta kana maus. Au na kila tak ia si kari an atakuk ania kuli ngakputuk.

Atakuk ani Iesu kuli ngakputuk

(Mt 27:32-44; Lk 23:26-43; Io 19:17-27)

²¹Na kila aisul pulit a mang igenen e selen Simon le Kurene, katapo palak taun a rina lava, na kapo tamarilong i ri Aleksandro ve Rupo, asi asalak ani kana ngakputuk. ²²Na kila tak ia ane si mangsikei a vuk oring kipo kin ia ta Golgota, supsupai ina ta vangang kumut. ²³Na kila alis ia ta laman i vaen mimirikukan, sikei kala misag ani inum ania. ²⁴Na kila atakuk ia kuli ngakputuk na kila gulang angkasai asi arai ta ki saka pagal an ani kana maus aniria. ²⁵Kata lapo tenei vauk na kila atakuk ia kuli ngakputuk. ²⁶Na kita salik a nem ang kitapo tupang ia singina asukang ke ta, “Tulava si ri Iudaia.” ²⁷⁻²⁸Na ngerena kita atakuk a mang ngono katakai i tainau, sikei e palso na mang anu e palkais ina. ²⁹Na vap po pasal angpok ang e iang kipo mengen i asosol ania na kipo valai ani paturia na kipo antok, “Numai vo antok ke ta ku galang na rina i atailai na ku atung pok ia si potol a taun, ³⁰ku asapang pok ua. Pasiang suai ani ngakputuk ang!” ³¹Na asukang kapa keve ainoinoai si ri katakai i sula ve vap malangas ani saupai kipo kurek angpok tatana asukang ke ta, “Katala asapang a mang vap, sikei parik kapa angkoai si asapang pok ania. ³²Igenen i akanangai ke, nia na tulava si ri Israel, ka kiksiang pelek a ngakputuk ang asi kara arai na tara lomlomom tatana!” Na ngono igenen ang kita atakuk kuvul irilong ve nia kilongpo kun mengen arikek ania.

Iesu kala mat

(Mt 27:45-56; Lk 23:44-49; Io 19:28-30)

³³Vuk taun ke katapo mang ias lava, sikei vong kala pakut a kuli rina aongos tung si kalapo ngelik aliu. ³⁴Na si kalapo ngelik, Iesu kala songosongo alava ta, “**Eloi, Eloi, lama sabakatani?**” Supsupai ina ta “**Kag God, kag God, sa tukulai ina kulapo papelek iau?**” ³⁵Na mang matan vap po angtung ang e iang kila longong ia na kilapo antok ta, “Arai, kapo songo nang a Elias!” ³⁶Na mang sikei a igenen kala sang na kanla luk a rudum katapo duk ta vaen namin mal singina, na kala atung ia e nono i vuk iei na ka lis ia asi kana inum, velai ani mengen asukang ke ta, “Kokoai, tara arai kotok ta Elias kame asapang ia.” ³⁷Na Iesu kala songosongo alava luai na kala kamus ta aus. ³⁸Na vakup ang nei lu i atailai kala tading angtaliungai le pangkul tung e kevkev. ³⁹Na mang ainoinoai si ri katakai i visvis katapo tung talang ia kuli ngakputuk, kata

longong ia si akamusai i aus, kala mengen asukang ke, “Tutuman luai, igenen ke kapo nat i God.” ⁴⁰Na e iang kapa, mang matan aina kitapo tere le ring vunga. Nei liuan iria ri Maria Magdalene ve mang Maria rinarilong i Iakovo lik ve Ioseto, na Salome, ⁴¹kitapo uli auai ve nia aino e Galilaia na kitapo papakangai ania, au na mang keve aina miang kapa, riria kita auai alak kuvul ane Ierusalem ve nia.

Mo ani Iesu

(Mt 27:57-61; Lk 23:50-56; Io 19:38-42)

⁴²Na si kalapo ngelik luai, using a taun ke kapo taun i usausa ani taun i atailai ilesvauk, ⁴³na Iosep le Arimataia, mangsikei a posongan i nei kuvkuvulan lava, na katapo atu mata ta kana vainagoan a God, kamela serei si Pilato, using kapo tav lolokovo e matana, na kala aikut ia ta pukun ina i Iesu. ⁴⁴Au, taun ang a Pilato kala longong ta kataala mat lenginang, kalapo tapping na kala songo na ainoinoai si ri katakai i visvis asi kana me luk malangas aro. ⁴⁵E mung i kana la longong tapai le si nguruna i ainoinoai ang ta kataala mat, kala alis a pukun si Iosep. ⁴⁶Na kanla samui le na vuk vakup roron luai na kamela kopos asiang ia na ka pakut ia ta vakup ang. Au na kanla amatung ia nei mangsikei a mata kita se ia nei bang. Na kala ul bat a mata ang ta iat lava. ⁴⁷Maria Magdalene na Maria rinana i Ioseto kilongta arai ani ring ang kata amatung a matmat singina.

Iesu kala tadut pok

(Mt 28:1-8; Lk 24:1-12; Io 20:1-10)

16 ¹Taun i atailai kala kamus na ri Maria Magdalene ve Maria rinana i Iakovo, na Salome kila samui bil sain ro le asi kari amoi ania. ²Si tenei vauk lik i taun tanginang e mung i taun i atailai, si makarap kalapo sanglak, kila pasal taun a mata ang. ³Na kipo angsusuai angpokpokai aliu aniria ta, “Si kana kan ul suai ani iat mete mata ang?” ⁴Au, kila takngo na kila arai ta lenginang kitala ul suai ani iat ang, using katapo iat lava luai. ⁵Au, kianla riuk lak nei mata ang na kila arai ani mang igenen tanginang katapo sinong e falso, katapo alak kana vakup posok, na kilapo sugul tapping. ⁶Na kala antok iria ta, “Mi ago ta tapping an. Mipo gule na Iesu le Nasaret nang kita atakuk ia kuli ngakputuk. Kataala tadut pok. Kapo kovek e ke. Arai kana na oring i amatung ania. ⁷Sikei, mi pasal na mianla mengen kana keve nat i akalit kuvul ve Petero kapa, ta ka pasal aino imi ane Galilaia, na mian arai ania e iang, asukang palau val kataala antok imi tatana.” ⁸Na kila soung suai na kila sip velai ani tetek na tapping. Kitapo tav mengen ani mangsikei using kita lapo leng.

Vuk palpal ke (16:9-20) katapo tav ago le si ainoai i salsalik. Vei kitala alakai ania e mung.

Tu aserei si Maria Magdalene

(Mt 28:9-10; Io 20:11-18)

[⁹Na taun kala tadut pok tenei vauk lik i taun tanginang e mung i taun i atailai, kala tung aserei aino si Maria Magdalene, nang kata lu suai ani limalengua na ingua ang pelek ia. ¹⁰Na kala pasal na kanla antok a keve tungana si kitapo makus na kipo tangis. ¹¹Taun ang kila longong ta katala to pok, na katanla arai ania, parik kipa lomlomom tatana.

Tu aserei si ngono nat i akalit

(Lk 24:13-35)

¹²E mung ina kala tung aserei ta mang pukun si pongua na nat i akalit si kilongpo pasal pok ane rina. ¹³Au, kilongla tapasuk pok na kilongmela mengen a mang matan ang, sikei parik kipa lomlomom tatana.

Iesu kata asok kana keve nat i akalit

(Mt 28:16-20; Lk 24:36-49; Io 20:19-23; Ap 1:6-8)

¹⁴Na e mung kamela tung aserei si 11 a nat i akalit akorong si kipo angan. Kala tatapokai aniria using parik kipa lomlomom na kapo kitmat kapa na vingaria, using parik kitapa lomlomom ta mengen si vap ang kitala arai ania e mung i kala tadut pok. ¹⁵Na kala antok iria ta, “Mi pasal na mian akuskus a ri vap aongos kuli rina ta akus ro. ¹⁶Na man a si ka lomlomom na mi asing tauia ia, ka to, sikei man a si kapo tav lomlomom, ka sunguk a mamaiten i kana rikek. ¹⁷Keve akanangai ke, ri vap lomlomom ki asereiai ania. Si asan ig ki kirikai ani ri ingua, ki mengen ta mengen i keve rina angpetpetekai. ¹⁸Ki teng alakat ri kene, na man ki inum a saka maras an, parik kipa rikek tatana, na ki amatung kunga lakat kuluria kipo malepen, na kila ro pok.”

Iesu kala palak ane pangkul

(Lk 24:50-53; Ap 1:9-11)

¹⁹Asukang a Volava Iesu, e mung i kana la mengen asip aniria, kala palak ane pangkul, na kanla sinong e falso ina i God. ²⁰Na kila pasal na kianla akuskus nei keve rina aongos. Na e iang Volava kata atutuman kari mengen si keve akanangai ang kitapo vil ia e mataria i ri vap.]

Vuk palpal ke katapo tav ago le si ainoai i salsalik. Vei kitala alakai ania e mung

[Au na keve bil aongos ang kitala longong ia, kianla mengen amalangas akudik ri Petero ve vap po auai ang ve nia. Na e mung ina, Iesu nia

akorong kala asok iria ane si keve palpal aongos i kuli rina, ani kian akuskus amalangas ta akus daus na tokos i vilvil ato ane si to asikei.]